

東
華
續
錄

東華續錄

光緒十二

臣朱壽朋敬編

臣汪錫增恭校

九月戊午朔獎擒獲江皖交界土匪員弁徐得貴等○九古恩奏請暫停冬團專事操練○予秀水縣烈婦鍾金氏旌表○沈葆楨奏江蘇外海水師各員於上年十二月初二日在冷家河洋面擒獲洋盜黃清等十二名戕斃及落水身死者九名委員會訊明確分別就地正法臣於本年五月十一日會摺奏報聲明此次各員弁異常出力援案陳乞 恩施查明另行獎勵在案旋准部咨光緒二年五月十三日軍機大臣奉 旨該部知道欽此欽遵咨行到臣當即分別咨行遵辦去後茲准江南提督臣李朝斌轉據蘇松狼山福山三鎮總兵滕嗣林等查明在事出力員弁開摺咨請核辦前來臣查此次水師員弁於大洋風浪之中設計將大夥洋盜二十餘名立時殲獲無遺實屬膽智兼優核與同治七年蘇松左營游擊張煜等獲盜保奏之案相符謹按所保各員擬加刪減擇其尤為出力者恭繕清單仰懇 天恩俯准勅部查照成案分別從優給獎以昭激勸等 旨李紹堯等均著照所請獎勵該部知道○己未以文銛經理關稅出力命以內務府三院卿候補○劉坤一奏臣於光緒二年四月二十九日准刑部咨議奏前

任兩廣總督英翰片奏嚴定拐騙人口罪名一摺廣東地方奸徒略誘內地民人出洋牟利該前督英翰以現值遠人開辦招工漢民勾結堪虞請仍照新定章程隨時就地懲辦事關變通成例未便懸擬相應請旨飭下新任兩廣督臣體察情形悉心酌核應如何定擬妥議章程奏明辦理以昭慎重而免枉縱等因素 旨依議欽此抄錄原奏咨行前來仰見 聖主於懲創匪類之中仍寓矜恤民命之意寸衷欽服莫可言宣伏查同治五年前督撫臣奏准如有內地奸民設計誘騙愚民雇與洋人承工受雇人並非情甘出口但誘已成爲首勒立決爲從絞立決地方獲犯審實錄供解勘先行正法歷經遵辦在案嗣因華民情甘出口由匪人和誘帶引出洋若照並非情甘出口之例概議研誅未免情輕法重又經前督臣瑞麟會同撫臣張兆棟奏奉 諭旨飭交部議照人口出境律爲首擬絞監候爲從杖一百流三千里至同治十三年十一月間張兆棟因外洋停止招工略誘出洋之案逐漸稀少於議覆御史鄧慶麟原奏慎重民命摺內請將誘拐人口出洋匪徒照尋常私罪人犯循例由司覆審解勘具題聽候部覆辦理毋庸先行正法並釐定章程在於省河黃埔兩處專派文武員弁認真稽查遇有誘拐匪徒嚴拿解究辦理尙屬周詳現准部咨前督臣英翰以祕魯國開辦招工奸人必將逞其故智藉端勾結請將誘拐匪徒仍照前定章程隨時就地懲辦臣體察情形悉心酌核竊以立法貴因時地寬猛必求合宜用刑自有常經損

益須歸至當固不可失之拘執亦不宜涉於紛更除情甘出口華民帶引出洋先經部議照將人口出境
律分別首從擬以絞候滿流毋庸另議外所有內地匪徒略誘人口出洋被誘之人並非情甘出口首從
各犯例應斬立決原未嘗稍涉輕縱從前因此等匪徒屢見迭出不得不嚴定科條於審明解勘後即
行正法俾奸徒觸目驚心知所懲戒隨以前項匪徒漸知斂迹市經復歸定例現在祕魯國來華招工雖
經議有條約粵東尚未開辦亦可無虞內地奸民藉端影射若違改照前定章程於審明後即行正法轉
不足以昭慎重相應請旨嗣後拿獲誘拐人口出洋匪徒被拐之人訊非情甘出口罪應斬絞立決者
照例由司擬訊解勘具題聽候部覆辦理毋庸先行正法仍由臣隨時察看情形如果日後匪徒膽敢肆
行略誘再當奏請從嚴懲辦所有酌核緣由謹會同廣東巡撫張兆棟恭摺覆陳下刑部議奏○辛酉
諭刑部奏訊取四川匪犯袁廷蛟供詞抄錄呈覽都察院奏申詳蕭宗瑀等聯名呈控帶兵官冤殺姦婦
請旨辦理御史李廷蕭奏四川重案復疑姦甚多請飭嚴訊各一摺四川匪犯袁廷蛟聚眾滋事一案
雖該犯所供並無撲營抗拒官兵情事遽難憑信惟該紳士呈控李有恆於鄉民到營呈訴即行斬殺所
殺確係良民並無匪徒且李有恆印示有失字各案搜殺無數之語亦與原奏並無搜殺羣民語相矛盾
並據該御史所稱案情重大原奏疑姦甚多應從嚴覆訊以成信讞李瀚章甫經到任無所用其迴護

此案著交李瀚章將李有恆有無搜殺無辜情事及袁廷蛟滋事各節未公確查據實具奏袁廷蛟一犯
卽著刑部仍遵前旨解回該省並將原供一併交李瀚章查辦○諭本年夏間江西省江水盛漲各屬
田廬被淹糧價昂貴必須有外來商販藉資接濟著劉秉璋督飭所屬地方各官體察情形設法招徠將
米糧盤暫爲停收酌定章程徧行曉諭一面知照各該省憲局遇運江西米糧卽速查驗放行一律暫免
釐金以裕民食○壬戌豐紳等奏推展稅務大概章程報聞○諭前據順天府奏請賞卹濟堂米石並於
蘆溝橋添設粥廠由截留東漕項下撥給粟米當經降旨允准因念京師自春入夏天時亢旱收成歉薄
現在糧價昂貴貧民餬口維艱著順天府體察情形應如何添設粥廠以資賑濟之處卽行妥議具奏以
副軫念窮黎至意○沈葆楨裕祿奏安徽省地當吳楚之中長江爲上下游往來必經之路凡商賈輻輳之
地奸究易於潛跡緝捕稽查不容稍懈地方情形如有今昔不同者例得因時制宜量移員缺駐紮歷經
辦理有案查皖南池州府屬銅陵縣之大通鎮地方濱臨大江離城較遠向來設有巡檢一員並陸路把
總一員駐於大通自咸豐三年後沿江被賊滋擾以致該處市鎮悉遭殘毀惟附近大通鎮僅隔箭許之
江面尚有蘆洲一片地段較闊四圍皆水俗呼荷葉洲所居洲戶初不過土著寥寥數家迨水師入江先
清江路卽就此洲屯紮以爲水營賊不敢犯於是四處商民紛紛避居於此貿易其間遂名之曰和悅洲

迄今十餘年來人烟稠密瓦屋如鱗已成皖境江面第一繁盛市鎮而游勇盜賊會匪亦最易潤跡其間該處分防文員仍只大通鎮巡檢一員實不足以資彈壓巡緝皖省如廬鳳潁三府本有移設鳳潁同知鳳廬同知分防捕盜之例今該處既成巨鎮地方緊要似須援案移員駐劄方資治理查皖南太平府同知一缺歷駐蕪湖縣分防江口雖蕪湖亦係沿江要區惟向有巡道暨蕪采營駐劄且係縣治該同知在彼事務較簡似可因地制宜移簡就繁以期得力當經飭司體察情形妥議詳辦去後茲據布政使紹誠署按察使王恩沂會議詳請具奏前來臣等伏查和悅洲地方自闢成市鎮以來商賈雲集五方雜處稽查彈壓均關緊要現查太平府江防同知向駐蕪湖縣事務既簡應請將該同知卽移設和悅洲改爲池太兩府江防捕盜同知專司巡緝稽查所有和悅洲市鎮一切賭博私宰枷杖案件責令該同知就近審理其刑名錢糧事件有承緝承追並審辦之案仍歸銅陵縣管理該同知駐劄該洲地重衝衢捕務繁要應請定爲衝繁要缺在外揀選題調並請另鑄池太二府江防捕盜同知關防一顆頒發開用以昭信守至原設太平府同知歲支俸銀八十兩門子工食銀十二兩步快工食銀四十八兩皂隸工食銀七十二兩轎傘扇夫工食銀四十二兩共銀二百五十四兩向歸蕪湖縣編徵解支又歲支養廉銀五百兩在於司庫放給今將該同知移設和悅洲改爲池太江防捕盜同知所有廉俸役食均仍照原額銀數分別徵

解支給毋庸另議增支以節經費其池州府屬之銅陵縣地方疎防案件承緝捕官開參典史並大通巡檢督緝廳員向係開參池州府通判其太平府當塗蕪湖繁昌三縣開參疎防督緝廳員向係開參駐劄蕪湖縣之江防同知改為池太同知移設和悅洲所有和悅洲並大通鎮地方遇有疎防案件請將承緝捕官開參大通巡檢督緝廳員開參池太同知毋庸再參池州府通判其餘各仍其舊分別開參以專責成原設太平府同知衙署兵燹後尚未修復現係賃住民房辦事今移設和悅洲仍令擇地暫賃民房辦公俟經費稍裕再建衙署太平府同知關防應請俟鑄頒池太江防捕盜同知新關防到日即行飭令申繳送部銷燬如蒙 俞允其原設太平府同知係屬簡缺現任之員是否能勝移設繁缺之任另行察看辦理下部議奏○癸亥諭本日引見之降調河南道監察御史吳可讀著以主事用○丙寅子故浙江布政使沈兆雲謚○張瀛因病請解任允之○黎培敬奏黔省上游地方遼廓軍務雖報肅清而土匪降日怙惡不悛負嵎抗拒地方官莫可如何臣任事以來查有大定府屬屯場橫匪何定功素行不法投誠以後仍肆猖獗強佔婦女佔擄田業無惡不作附近居民受其荼毒靡不切齒訪知該逆盤踞地勢險要且黨與甚衆密飭駐防平遠補用提督陶茂林就近設法誘擒陶茂林出具不意直搗該逆巢穴一鼓攻克該逆之母及其兄弟妻妾十餘人悉數就擒並殲其悍黨王皮盤蔣登科等該逆子身漏網潛竄雲南邊

境意圖勾結報復陶茂林飛派將弁蕭傳武跟蹤追捕一面咨會督臣劉長佑嚴密查拿該逆探悉情
形遂復逃匿四川納溪縣蕭傳武是夜馳追偵知該逆所在密約納溪縣派役四面圍拿該逆因獸猶關
蕭傳武奮力直前用大刀砍傷其頭立即綑縛解回防營經陶茂林會同地方官訊取確供直認不諱立
予梟示以彰國法而快人心所有強佔婦女佔耕田業查明親屬概予給還地方一律安靖此外不法
匪徒仍隨時嚴飭地方官及防營一體認真搜緝總期除暴安良以副朝廷綏靖邊陲之至意報聞
○丁卯以林壽圖爲山西布政使○英震奏宗室文武仕途設立員缺無幾且多係京職以前人數尙少
似覺道路甚寬今則人數日盛有志上進者每因入仕艱難不能不退而思轉其閒散宗室養贍錢糧年
至十歲始食二兩年至二十歲始食三兩後復改爲十五歲始食二兩當初食餉者有限各府之甲亦足
分贍宗族今則紅名不下數千餘人錢糧按現放章程食二三兩者僅得一兩有餘雖養一身不足何能
仰事俯畜況誰無父母誰無妻子更何所賴是以宗室案件層出不窮近來覺羅紅名亦不下數千餘人
而犯案者少豈宗室中獨多不肖誠以生齒日繁養贍不足圖上進則仕途甚少謀生計則到處皆難勢
不能不陷於罪戾耳然覺羅仕途均照滿洲章程各營亦可食餉故覺羅尙可支持而宗室獨形困苦也
我朝敦宗睦族列祖列宗皆有明訓皇上錫類推恩凡四海臣庶無不仰承厚澤而宗室無

論遠近均屬一本若任其陵替聽其淪落實覺可憫可否請 旨交宗人府將宗室仕途及養贍宜如何

變通之處妥議詳辦奏請 恩施 上諭御史英震奏宗室仕途及養贍請量為變通一摺著宗人府會

同該部議奏○戊辰調李瀚章為湖廣總督以丁寶楨為四川總督調文格為山東巡撫以潘鼎新為雲

南巡撫杜瑞聯為雲南布政使方濬頤為四川按察使○文煜奏前因福建被水難民待賑孔殷臣等因

事機急迫籲懇 天恩請照同治十年天津成案辦理仰荷 聖慈照准閩中數十萬哀鴻仰瞻 天日

無不感激涕零惟臣等初以為天津賑案不過准保虛銜今始查明除道府州縣不准捐外其餘實職亦

可准捐復查閩省候補佐貳過多同知通判向章准著州縣各缺佐貳紛至沓來本無虛日若再在此准

捐實職官吏愈多得缺愈難當其候補本有朝不保暮之憂迫得地方百姓有祇權及米之慮將來民怨

日深釀成事變未免所得者小所失者大古人有謂捐輸之害甚於水火盜賊言雖過激不為無見蓋水

火盜賊為患只在一時捐輸濫開貧劣之徒攫民脂膏虐民性命流毒且將數世苟非值萬不得已之時

亦何肯為飲鳩止渴之計臣等現在熟商此次閩省辦理水災除本省官吏捐輸無庸給予獎敘外其餘

本省紳民以及各省官紳所捐銀米一俟集有成數即當仍照天津成例仰乞 聖恩准其封典虛銜以

昭激勵惟不准捐實職捐數實難踴躍臣等惟有核實辦理不令絲毫中飽庶災民得免顛沛既可上廣

皇仁而名器不致濫開亦免稍滋流弊得 旨如所請行○已已鑲黃旗漢軍都統春佑卒賞銀五百兩治喪○總理各國事務衙門奏 臣衙門前因出使各國每年俸薪等項約需銀五六十萬兩擬請於各關六成洋稅項下提撥等因於本年八月初九日會同戶部具奏奉 旨依議欽此十三日 臣衙門又將出使俸薪等項酌定銀數開單具奏並經聲明即照奏准日期開支奉 旨依議欽此欽遵各在案 臣等查此次 簡派使臣分駐各國統率參贊領事等官辦理一切交涉事件責任既甚重大經費尤覺繁多且事屬創始並無成案可循自應明定章程以資遵守而昭核實 臣等公同商酌謹擬出使章程並於前奏稍為變通共十二條繕單恭呈 御覽如蒙 俞允即由 臣衙門分別行知遵照此外如有未盡事宜仍由 臣等隨時參酌奏明辦理得 旨如所議行 章程十二條 一擬由禮部鑄造銅關防頒發出使各國大臣各一顆以昭信守其文曰 大清欽差出使大臣關防其未頒發以前先刊木質關防行用一出使各國大臣擬自到某國之日起約以三年為期期滿前由 臣衙門預請簡派大臣接辦各國副使亦一律辦理 一出使各國大臣分頭二三等名目此次辦理伊始所有現在業經派出各國大臣擬請均暫作為二等 一出使各國大臣所帶參贊領事繙譯等員應由該大臣酌定人數開列姓名等項知照 臣衙門查核各該員亦隨同出使大臣以三年為期年滿奏獎如有堪留用者應由接辦大臣酌留不

能得力亦卽隨時撤回 一出使各國大臣到各國後除緊要事件隨時陳奏外其尋常事件兩知衙門轉爲入奏 一出使各國大臣有兼攝數國事務者應如何分駐之處由該大臣酌定知照衙門查核 一出使各國大臣月給俸薪請照現在實職官階支給惟原擬二三品充二等欵差者月給俸薪一千二百兩三四品充三等欵差者三品一千兩四品八百兩其四品充二等者未經議及今酌中定擬月給一千兩至各國副使擬月給銀七百兩 一出使各國大臣有兼攝數國事務者月給俸薪毋庸另加各國副使亦一律辦理 一出使各國大臣及副使以下各員月給俸薪自到某國之日起各按應得銀數支給扣足三年爲期期滿停支俸薪如接辦大臣尙未到期滿大臣尙未交卸應按照在任日期算給俟接辦大臣到後任支副使以下各員亦一律辦理其參贊領事繕譯等員如經接辦大臣留用者俸薪卽從年滿日接算支給 一出使各國大臣及副使以下各員由中國起程及由差次回華行裝歸裝均需整頓所有往返兩項整裝擬各按三箇月俸薪銀數支給由衙門前擬各關六成洋稅內動支 一出使各國大臣等每年俸薪及往返盤費駐劄各國一切經費等項由該大臣按年分晰造報衙門查核 一出使各國大臣等俸薪及往返盤費駐紮各國一切經費等項由江海關彙齊按年匯寄應如何分別匯寄之處由衙門酌知總稅務司遵照辦理○諭總理各國事務衙門奏川省民教滋事各案

請飭該省迅速持平辦理一摺川省民教仇殺據法國使臣稱傷斃教民二十餘命搶毀二百餘家與魁
玉等兩報該衙門情節不盡相同此外該省鄰水南充巴州營山等處民教滋事尙有四案是川省民教
積不相能日與尋仇深恐釀成禍患現在魁玉等兩報該衙門內江縣有團民殺斃教民之案鄰水縣有
教民殺斃團民之案均有拆毀教堂之事法國使臣卽有鄰水教案請爲保護之詞而應迅速持平辦結
以弭釁端近來中外交涉事件甚多措置稍有不當卽致枝節叢生不可收拾該省教案屢見疊出尤當
設法妥辦早爲完結以靖地方○諭內閣四川省民人與該處教民挾嫌構讐案犯到官地方官自應將
滋事根由確切訊明秉公迅速辦結何得日久拖延乃該處川北廳及內江鄰水南充巴州營山等處均
有民教滋事之案未據訊結殊屬延玩著成都將軍四川總督飭該地方官迅將各案查訊明確持平辦
理並隨時分別良莠撫綏彈壓毋任尋仇生事以靖地方○庚午賞何璟於紫禁城內騎馬○辛未以河
南布政使劉齊銜撥款濟工交部優敘並獎督防出力道員德馨等○頒給河南河神廟匾額○癸酉恩
紳托克端奏呼蘭存糧逾額請照舊章蠲給兵丁報聞○彭玉麟奏奉 命巡閱長江水師本年三月
二十日在衡州起程業於三月二十四日在長沙省城專摺奏報奉 旨知道了欽此欽遵在案 臣拜摺
後扶疾起程自荊州以次接營認真核閱查前兩江督臣曾國藩原定章程水師以使船爲第一義考缺

升補以盡樂速定其優劣近來營哨官未能尋繹此義往往於更換勇糧時以陸營遺勇充補以致盡棄一事技藝生疏即使演礮有准已失使船之本義臣有鑒此弊於查閱時竭力整頓凡棄兵技劣者立時責革並將營哨各官一併分別棍責示懲其有必應參辦者咨明各督撫臣彙案奏參以一事權前陝甘督臣楊岳斌於長沙及江西等處會晤兩次將各營事宜和衷商酌臣精力日衰往年嗜血及筋骨疼痛等症春夏較甚秋間可以漸減今則交秋以後仍復時時舉發自維衰病之軀仰承 殊眷不獨時局艱難毫無裨益卽此長江分內應辦之事亦僅能補救於萬一撫衷循省抱疚實深茲於八月二十日行抵蘇州省城所有沿江各營及狼山海口等處均已查閱一周擬卽遵照奏定章程至浙江休慮度歲調理病軀如有應辦之事仍隨時咨會長江提臣李成謀等會詳辦理報聞○甲戌諭刑部奏承審浙江民婦萬畢氏毒斃本夫一案援案請飭提驗一摺著楊昌濬將餘杭縣知縣劉錫彤卽行解任同門丁沈彩泉暨葛品連屍棺並同治六七年間該縣驗訊陳觀發案卷派員一併押解送部傳令劉錫彤眼同檢視以成信讞○諭前因京師糧價昂貴貧民餬口維艱降旨令順天府將體察情形應如何添設粥廠妥議具奏茲據萬青藜等奏請於禮賢鎮等處添設粥廠撥米賑濟並請派員監放等語著照所請於十月十五日在禮賢鎮定福莊清河鎮龍各莊四處開廠散放萬青藜等督飭委員分赴各廠按照所議各條認

真經理並著派惠泉于凌晨率社文碩前往稽察彈壓妥爲監放務使實惠及民用副朝廷軫念民艱至
意○先是同治五年七月英國商人擅築鐵路自上海遠寶山之江灣鎮至本年三月又展至吳淞兩江
總督沈葆楨江蘇巡撫吳元炳迭飭上海道馮煥光照會英國領事麥華陀阻止不允又咨總理各國事
務衙門照會英國使臣威妥瑪飭阻亦不允旋由總理各國事務衙門奏陳情形得 旨著李鴻章妥商
歸宿之法六月間火車開行壓斃人命威妥瑪乃飭令停止行駛李鴻章派道員朱其詒盛宣懷與威妥
瑪所派之漢文正使梅輝立會議於上海本月初一日又至江甯籌議初八日議定以規平銀二十八萬
五千兩買斷行止聽中國自便至是條款成李鴻章沈葆楨吳元炳會同具奏尋以鐵路不適用於中國
毀之○總理各國事務衙門奏欽差大臣署禮部左侍郎郭嵩燾等奏出使英國酌帶隨員摺一件單一
件光緒二年九月十五日軍機大臣面奉 諭旨著該衙門議奏欽此欽遵由軍機處抄交到 臣衙門據
原奏內稱此次遣派公使實爲創行之典請酌定參贊二員繙譯四員其餘文案武弁醫士均應分別調
派謹開清單恭呈 御覽並請飭下江蘇河南各撫分別知照各該員趕速料理隨同出洋英國三島
並無華商貿易無從設立領事而所轄南洋沿海地方如新嘉坡孟加拉檳榔嶼錫蘭等處華民流寓至
數十萬人應否設立領事須俟察看情形所帶參贊文案各員皆可斟酌委派 奏明請 旨其應用工

役並由公使攜帶不別開支經費等語臣等伏查本年八月十三日臣衙門於具奏出使各國經費分別酌定數目摺內聲明頭等參贊官月給俸薪五百兩二等月給四百兩三等月給三百兩頭等繙譯官月給俸薪四百兩二等月給三百兩三等月給二百兩隨員醫官月給俸薪二百兩其餘武弁供事學生每月每人約百兩以內由出使大臣屆時酌定準數作正開銷又於九月十二日臣衙門奏陳出使章程十二條內聲明出使各國大臣所帶參贊領事繙譯等官應酌定人數開列姓名等項知照臣衙門查核各該員亦隨同出使大臣以三年為期年滿奏獎儘不能得力亦必隨時撤回其月給俸薪自到某國之日起各按應得銀數支給扣足三年為期期滿停支俸薪由中國起程及由差次回華行裝歸裝均按三箇月俸薪銀數支給等因先後奏准行知各該大臣遵照在案今據出使英國大臣郭嵩焘奏請酌定參贊繙譯等員名數並聲明給發薪水應否分別等第等因臣等公同商酌請將該大臣等派充參贊之布政使銜貴州候補道張自牧作為二等參贊官江蘇候補知州黎庶昌作為三等參贊官派充繙譯之兵部候補員外郎德明戶部候補員外郎鳳儀作為三等繙譯官此外如有應用外國繙譯應由該大臣等隨時酌定連中國繙譯在內不得過該大臣所定四員之數以示限制至該大臣所請將刑部主事汪樹堂候補通判張斯栒廣東候補知縣李荆門候選縣丞羅世琨等四員派充文案等查臣衙門前奏出使

經費摺內祇有隨員醫官並無文案名目因請將該大臣等隨帶之文案四員作為隨員各按月給俸薪二百兩之數支給此外自無須另行咨調人員以節糜費至該大臣等奏稱英國三島無從設立領事而所轄南洋新嘉坡等處羣民流寓數十萬人倘應設立領事所攝參贊等員內皆可斟酌委派 奏明請旨等因應如所議辦理屆時人數或有不敷再由該大臣等酌度奏咨調往如蒙 俞允卽由臣衙門行知該大臣等遵照並咨令在京各衙門及該督撫等轉飭各該員卽日束裝起程探明該大臣等行抵何處星速前赴隨同出洋毋得稍延其各該員出洋時應得行裝銀兩准其查照臣衙門奏定章程各按三箇月俸薪銀數支給俾利進行如有不能得力及緣事未能隨同前往者該員所得行裝銀兩應由該大臣飭令繳回以重款項得 旨如所議行○丁日昌奏臺灣吏治黷無天日牧令能以撫字教養為心者不過百之一二其餘非性耽安逸卽剝削膏脂百姓怨毒已深無可控訴往往鋌而走險釀成大變臺海所以相傳無十年不反之說也臣今年到任後查訪各情卽將科派百姓捐輸津貼州縣倉穀自盡命案株連拖累及牛捐諸弊政嚴行裁革仍恐該廳縣陽奉陰違復飭將告示勒石摹揭分貼各鄉俾百姓永遠周知不致再受訛索其差役誣以爲盜佐雜擅押平民以及詞訟延不造報無不隨時參辦諄諄告誡不啻管堦焦所有貪酷各員如彰化縣朱幹隆嘉義縣楊寶吾等均已先後據實嚴參請 旨查辦

在案楊寶吾之撤也臣以嘉義百姓久在水火之中若由省派委轉致曠日持久候補縣何鑾在彰化格斃著匪林位新立巨功既專摺奏請獎勵復飭就近接署嘉義縣案所以期望而鼓勵之者不可謂不至矣並經兩屬夏獻綸轉飭何鑾務須振作精神不可沿緣舊習仍密加察訪如該員不能奮發有為卽行據實嚴參茲據該道稟稱何鑾到任後收受書吏稅契陋規不惟不肯酌減且欲多增請將該令撤委等情前來臣查嘉義稅契浮收至重新官到任書吏必有點規從前四五千圓近來竟加至一萬餘圓而書吏轉搜之於民者又不啻倍蓰以致一官新至勢必稅契四出鹽菜叫囂雞犬無聲民不安枕楊寶吾前因催收稅契釀成命案甫經查辦而何鑾委署此缺復敢尤而效之若不認真嚴効民困何由得甦吏役何由得肅該道夏獻綸僅請將何鑾撤委未足蔽辜除嚴飭臺灣道府將各屬稅契陋規全行撤革並由臣出示勒石永禁仍屬藩司另委賢員前往署理嘉義縣外相應請 旨將署嘉義縣事花翎補用同知候補班儘先補用知縣何鑾先行革職仍飭夏獻綸澈底確查如有需索逼勒情弊再加嚴辦其前次格斃著匪林位保准加知府銜以應升之缺升用並請 旨勅部一併飭銷至臣誤保劣員雖不敢徇隱於後究屬無知人之明應如何懲處之處伏候 聖裁 上諭丁日昌奏請將濫收陋規之知縣革職等語前因嘉義縣知縣楊寶吾濫收陋規經丁日昌奏參查辦委候補知縣何鑾前往署理乃該員到任後收

受書吏稅契陋規不惟不肯酌減且欲多增實屬不知自愛何鑒著先行革職倘查有需索過勒情弊卽行從嚴參辦丁日昌以誤保在前自請議處著加恩寬免○丁丑以河工出力予山東布政使李元華等獎敘有差○沈葆楨奏准福建陸路提督唐定奎文稱武毅右營副營哨官儘先守備周萬林上年從征臺灣所向有功內渡以來操練罔懈本年移駐江陰幫築礮臺七月十六日正在趕築之際不意打椿機器脫鉗礮裂礮門登時殞命殊深憫惻懇請照陣亡例奏卹前來臣查該守備從征既久勇敢爭先茲因建築礮臺猝然殞命實與臨陣捐軀無異合無仰懇 天恩俯准將儘先守備周萬林照陣亡例議卹以慰忠魂得 旨周萬林著交部照陣亡例議卹○戊寅沈葆楨奏本年夏間徐宿等處土匪竄起徐州鎮總兵董鳳高於臣等未經檄調之先卽親帶弁兵出境迎剿有膽有識不愧專閫之選彼時天氣亢旱各路股匪乘機竊發流言籍籍深恐釀成巨患竟能殲厥渠魁期歲事固賴各將士踴躍用命實由董鳳高調度得宜該總兵職分較崇未敢奏請獎敘應如何 施恩之處出自 聖裁得 旨董鳳高著交部從優議敘○己卯李慶麟奏冬潛離辦本色得 旨如所請行並下戶部知之○李鴻章奏遵議駐庫宣化練軍改練馬隊籌餉下部知之○予前杭州殉難鄭容觀鄭陳氏等全家二十六人旌卹○辛巳丁寶楨奏潛船遭風沈失請免賠補允之○壬午諭都察院奏奉天職員李崇林以伊堂兄前漕標候補衛千

總李過春在籍禦賊陣亡等詞赴該衙門呈訴懇請恩卹著崇實查明奏請賜卹○癸未諭工部奏請飭
籌修節孝祠一摺京師八旗兩翼節孝祠年久失修著順天府審度情形酌量辦理○諭吳鴻恩奏四川
銅梁縣 關帝廟請頒匾額並加該縣城隍神封號著四川總督查明具奏○甲申崇實等奏興京毗連
邊外添設副都統原為保衛 陵山控馭邊陲所關甚重查該處協領衙門存有用廢邊地升科租錢經
前任將軍奏明留供邊外度支該副都統兼轄邊外此項租錢堪以暫為動用擬由本年起每年准其動
支東錢一萬千合銀僅及千兩為數尙屬無多俟邊務大定再行核議指款撥給報聞○崇實等奏興京
添設領催兵四百六十名應備軍器火藥等項亟應添製以資操防現據該副都統色楞額咨請領撥鎗
四十八桿烏鎗紅衣礮三百桿並照省城春秋二季操演次數出數之例每年應需火藥二千二百十八
斤二兩烘藥一百四十五斤零五錢鉛丸三千三百六十三斤十二兩火繩二千二百六十二丈並撫順
添撥領催兵七十名應添撥鎗八桿烏鎗四十桿每年應需火藥三百四十一斤四兩烘藥二十三斤十
四兩二錢鉛丸五百二十斤火繩三百一十二丈造具清冊委員領取前來檢查成案各旗營需用鎗械
軍火例由工部領取現經奴才崇實查所有年來紆糴賊匪存公鎗械檢其尙可使用者如數給領惟火
藥鉛丸等項向係年製年用並無餘存擬請由 盛京工部隔年例火藥內如數加添製造發給領用報

聞○乙酉劉長佑奏據雲南善後局司道倉景愉等會議通省各標鎮協營兵餉前因庫款奇絀協餉解到寥寥未能照額支發因擬將各營馬兵餉暫行緩發其步戰兵挑入練軍分布邊防並調查隨時操演預備遣派所需糧餉照數支發惟留營未挑入練軍之戰兵及不挑練軍之守兵餉項緩發七成先發三成自上年冬月照章辦理在案覆查各營僅存三成兵丁為數甚少且上年所定章程守兵不抽練軍例照營制原額減七留三戰兵則係於抽調練軍之外將抽剩存營數內又復減七留三是未抽練軍之營尚存三成戰兵而已抽練軍之營存營戰兵不及一成矣是以各地方文武動以不敷防守為辭其抽練之兵盡數調出城守防汛幾成虛設紛紛請將練軍發回辦理情形掣肘自應酌添防守兵餉以期制兵練軍均有實際該司道公同酌議擬將通省戰兵守兵均按營制原額酌減一半統留五成其月餉悉照五成兵數籌發計比現在所發三成月餉每年加添銀一十五萬三千一百四十二兩五錢七分四釐合之提鎮將弁俸廉及現發三成守兵月餉每年共需銀四十萬零四千六百八十一兩二錢一分惟兵餉既經議增則練軍自應議減查滇省肅清未久各處伏莽不時竊發如現議之兵資以防守則有餘用之堵剿則不足是練軍未能多撤而練餉尚須另籌也現擬酌留練軍十二營並將原定章程酌量改更力求撙節計每年尚需銀十萬餘兩雖較撤七留三舊案銀數略增而似比戰守兼資緩急有恃尚可以

求實際而免虛糜詳核辦前來臣維此時軍情未定故不能再事紛更而從前營制未明亦不能稍涉拘泥且餉需之奇絀爲他省所未聞雖仰荷 聖慈俯准開捐撥協俾濟要需而兵餉既須酌增練餉又難多減其餘因革損益之間亦極慘澹經營之意臣與署撫臣惟當督同司道及各鎮將於度支力求撙節於營伍加意請求如入款稍充仍當漸復兵制邊防粗靖並可酌撤練軍以仰副 朝廷制節不過戒備不虞至意下部知之○丙戌吳元炳奏江甯駐防調補官兵應添俸餉請將清河等七州縣漕折價銀截留抵支下戶部議奏○吳元炳奏布政使銜前安徽候補道陸乃普遵故父遺命捐田贖族懇請 飭部立案報聞○吳元炳奏金甌縣五品封職議敘縣丞華承寬遵故父兄遺命捐田贖族將冊結咨部查核報聞○瑞聯奏奴才拜摺後於八月二十二日帶印起程二十四日行抵園場恭謁 東廟宮後由正藍止白地界取道沿途巡視周歷前任都統庫克吉泰奏明騰出各園逐細查勘九月初一日恭謁 西廟宮出園於初三日回署伏查園場土脈膏腴地勢奧衍山川雄秀之氣絡繹綿亙誠天造地設之靈罔爲我 國家億萬年講武綏邊勝地原不容輕議開墾奴才於履勘時詳詢園弁等年某處設立大營某處設立看城某處爲驅獸入園之路某處合圍合計一園必須二三十里統計七十二園以園中里數計之竟無所謂邊荒是已撤者爲正園未撤者亦不得謂非正園也其中已開之地阡陌縱橫秋稼業已

登場雲屯露積有已成卽落者慮會鱗次東園正藍正白兩旗幾無隙地西園地脈較遜僅放九圍查罕
西呼一圍先已放出後經撤回前任都統庫克吉泰辦理騰圍時漏未入奏坡賴一圍並未勘放誤列已
騰圍中此外已騰之布敦川內永安莽喀巴彥喀拉喀哩雅吐伊遜川內巴彥西那四圍蔓草連綿並無
偷墾痕跡惟所築界牆土甚鬆活萬難經久奴才當面飭圍場總管嚴加防守不准民人再行越墾園中
各山間未開墾之先樹林陰翳牲畜蕃育現在東園林木多遭削伐已成童山西園樹木尙多奴才行走
數日並未遇一野獸其爲人煙稠密避而遠走可知奴才目擊圍場情形知歷任都統俱未親歷其境但
憑委員查報卽據以入奏故於圍場事宜諸多隔膜以致一誤再誤幾至不可收拾此次欲歸復舊制但
民生聚已十餘年驅逐既非 朝廷寬大之恩撫綏又乏萬全之術奴才惟有實事求是通盤籌畫總期
於民生 國計兩有裨益以仰副 聖主肅清閭閻之至意報聞○丁亥 上詣 太廟行禮○涂宗瀛
奏越南國使臣進關日期並照錄該國王表奏各稿恭呈 御覽其表文曰越南國王阮福時稽首頓
首謹 上言茲仰見 堯階日照桂甸風清暨南之 文命誕敷拱北之脕枕冒遠誦奉表 上進者伏
以 皇時建五庶邦翹 柔遠之仁使驛重三下國效依光之願蓬萊紫氣芹曝丹心欽惟 大皇帝陛
下 乾御當陽啓明出地中國有 聖四方之視聽維新天下爲家 二曜之照臨無外波不揚於周海

瑞華軒於虞庭念_臣炎邦世茲藩服久沾 同文之化夙敦逃職之誠茲奉 貢儀式遵例進焚香展敬
望 闕伸虔_臣遙仗 寵靈恪修職貢 王道砥矢願率履以不違國分山河永承休於無斁_臣不勝瞻
天仰 聖激切屏營之至又奏稱越南國王_臣阮福時稽首頓首謹 奏為恭值 貢期虔修旅館事
_臣國仰荷 天朝封殖世列職方經奉 酌定貢例四年一次永為成式嗣屆 貢期遵例恭進如依本
年正月日以次年正屆 貢期具由咨明廣西撫部院代為 題達嗣接照會公文定於本年八月初一
日開關_臣開 命之下頂戴惟虔竊思周服奠維全資安勸夏庭逃職係奉典常此次貢期稔遵例進貢
惟 天朝俯鑒恭順之誠俾下國得遂尊親之悃_臣恪遵候度遙望 天闕謹將丁丑歲 貢品儀交陪
_臣裴文禔林宏聚古等齋遞欽候 恩准實收得 旨下禮部知之○沈葆楨文彬吳元炳奏查淮揚徐
海四屬向設淮揚淮海徐州三道兼管河務地方事宜淮揚道管轄揚州府所屬各州縣及淮安府所屬
之山陽鹽城清河桃源四縣淮海道管轄海州所屬各縣及淮安府屬之阜甯安東二縣徐州道管轄徐
州府所屬各州縣咸豐十年裁撤南河各缺將淮揚淮海兩道一併裁汰所有應管事宜統歸徐州道兼
管作為淮徐揚海道同治三年經前督_臣曾國藩等奏請復設淮揚道管理淮揚兩屬具海州一屬巡道
應管事宜仍歸徐道管轄作為徐海兵備道奉部覆准在案伏查海州一屬幅員遼闊政務殷繁自海至

徐達隔五百餘里實有鞭長莫及之勢兼之道路荒僻遇有文報必遞至清河縣驛止站再遞徐州動經旬日事機既虞遲滯控制尤屬難周加以該州拿獲重犯例解巡道提勘後解司勘轉計自該州北解主徐再由徐南解赴省往返多繞千里不特重犯遞解堪虞卽解道勘審之車流徒犯亦覺連道接遞徒多跋涉擬請將海州一屬改歸淮揚道就近管轄以資控制據藩臬兩司會同徐海淮揚兩道核議詳覆請奏前來臣等往返商意見相同合無仰懇 天恩勅部准將淮揚道改作淮海海道徐海道改作徐州道如此一轉移間官制一切均無須更張而於地方公事實有裨益下吏部議奏○左宗棠奏據總理行營營務三品卿銜布政使銜西甯道法福凌阿巴圖魯劉錦棠稟報烏魯木齊迪化州各城克復後昌吉呼圖壁各城客土逆回及踞瑪納斯北城逆回余小虎均於六月底先後翻山鼠竄南路瑪納斯南城土回頭目黑寶財亦於七月初一日率其死黨向南竄逸餘逆猶踞城死守金順山昌吉親率各營赴瑪納斯督攻臣得金順函告兩城中間相聯關廂盡破搗大礮轟攻可期速克福珠哩書來亦云旦夕可望得手也劉錦棠調知各城敗竄之賊伏匿東南山谷間覘官軍動靜遂下令分路搜山七月初六日提督譚和義陶生林等率所部取道七道灣赴東山提督黃萬鵬陝安鎮總兵余虎恩甯夏鎮總兵譚拔萃漢中鎮總兵譚上連取道大小鹽池墩向東南一帶節節搜捕至柴窩堡均略有斬獲訊究活賊供稱敗賊谷

口輜重已悉數南徙壯丁均歸集柴窩堡西百二十里達板城其白彥虎余小虎等敗殘股匪踞南山小東溝口喊各賊赴南山大西溝水西溝板房溝一帶收秋稼備乾糧俟官軍進攻達板城卽乘機由南山古牧地阜康撥官軍後路劉錦棠一面咨商錫綸額爾慶額及東路各防營嚴密整備一面飭余虎恩譚拔萃率所部馬步於初九日仍赴鹽池扼紮派馬隊復進柴窩堡防賊橫竄是夜劉錦棠帶馬步各營向小東溝進發初十日黎明瞥見山旁騎賊數十飛奔而西遂整隊急追行四十里抵小東溝口追斬四十餘騎生擒三賊訊據供稱賊谷先一日移進金口峽距小東溝約九十里劉錦棠率馬部緊追比抵金口峽惟見老幼婦女踉蹌奔逃而白余諸逆已率黨遁逃托克遜安集延賊巢矣劉錦棠令各營收賊遺未穫秋糧十二日仍返烏垣因後路古城濟木薩以西三臺滋泥泉阜康等境時有零騎剽掠不辨其土回與游勇復派馬步各隊會同該處防營嚴密搜捕適聞瑪納斯南城土回仍堅踞如故官軍屢次猛攻均未得手且有傷亡金順緘調數營助勦劉錦棠派甯夏鎮總兵譚拔萃道員羅長祐提督黃萬鵬總兵董福祥等率步隊六營馬隊五旗赴之八月十五日起行尙未接其戰事稟報也據探安集延酋怕夏已派賊騎五千合烏垣紅廟逸去之賊踞烏垣南一百餘里之達板城卽囑遜營以拒官軍怕夏自踞托克遜築三城爲犄角與其悍黨守之白余兩逆入托克遜怕夏待之甚倨並勒其隨行賊衆薙髮易服份三城

以居察度南路賊勢守吐魯番者拒哈密官軍守達板者拒烏桓官軍皆所以護托克遜堅巢也而達板托克遜尤悍賊羈聚之區賊騎皆多至數千守禦甚固臣現咨廣東提督張曜率所部肅武軍由哈密之西進至勝壘入吐魯番界取道七克騰木以向廟展飭提督徐占彪率所部蜀軍由巴古之間分段搜山凡通吐魯番各徑皆通行搜捕搜過縱火焚山杜其零星伏匿其馬步大隊則由木壘河節節搜進而至木壘河地勢寬衍可容萬騎亦饒水草木通吐魯番大道雍正中岳鍾琪奏稱以重軍駐此可保必效者也七克騰木關展賊均設卡官軍須順道攻拔以便屯集糧餉軍火由七克騰木西行二百餘里則吐魯番其劉錦棠由烏魯木齊南下之軍宜先固後路計古城以西濟木薩三台滋泥泉阜康古牧地相距五百里金順所部防兵陸續調撥前進底營寥寥劉錦棠分駐馬步各營仍應相隨南下臣緘商劉錦棠令各防營亦節節搜捕前進然後以金順續調錫綸馬步各營扼之重後路之防劉錦棠馬步全軍僅二十五營既須分布後路又須留守烏桓屯集糧餉軍火乃可進攻達板城而進攻之軍行過小東溝口地方有橫路通托克遜又須分營扼截抄後之賊是兵力以分而愈單也張曜徐占彪兩軍能速拔吐魯番分趨西北以供達板之南庶可牽掣賊勢與劉錦棠收夾擊之效而吐魯番毗連托克遜防禦又不可少疎臣撥副將秦玉盛馬隊一營交徐占彪撥副將武朝聘馬隊一營交張曜並令礮隊游擊陳文英帶開花

礮及仿製短礮山開花礮助之陸續成行矣臣念劉錦棠全軍分而見單飭參將侯名貴所管礮隊護開花後膛大礮兩尊車架開花後膛小礮四尊又飭解後膛七響鎗三百桿勻配子藥赴烏桓續調肅州鎮總兵章洪勝總兵方友升帶所部馬隊兩營總兵桂錫楨馬隊一營均歸劉錦棠節制調遣實可稍助軍鋒凡所添調馬步加撥軍械均令次第前進其張曜徐占彪兩軍已整齊隊伍準備啟行臣以兩軍防所距吐魯番道路迂直險夷不一程途遠近攸分應各確計日期以爲啟行先後之準其師期則由劉錦棠酌定庶彼此進止合度不至先後參差協力並規乃期周妥現接劉錦棠稟報已派十一營赴瑪納斯之調必俟北路一律肅清收隊回烏乃能下兵南路其師期固未可由臣預定也至南路今歲旱蝗爲災收成歉薄官軍轉戰而前恐未能因糧於賊自不得不預爲廣籌採運以赴戎機現飭古城採新糧三萬石備運烏魯木齊巴里坤採新糧七千石合歸包甯夏已採陳糧二萬餘石備供徐占彪一軍及防營之用哈密無糧可採由肅州玉門墩糧採運新糧接濟約可二萬石備供張曜一軍之用徐占彪西行後以總兵徐萬福三營提督范銘一營填防張曜西行後以總兵劉鳳清帶軍八百人移駐七克騰木防護運道哈密之防已咨辦事大臣明春就近辦理明春肯顧大局所部兵勇自簡練後均精實可用與張曜極爲聯絡差爲慰幸所有布置情形謹據實馳陳又奏臣與金順會師西征幸仗 皇威速勘北路應卽下兵

南路規復舊疆南路自乾隆二十四年平定後建城凡八曰喀什噶爾曰英吉沙爾曰葉爾羌曰河闕曰阿克蘇曰烏什曰庫車曰喀喇沙爾世呼爲南八城而吐魯番別爲一部不在八城之列以其地在大山之南爲南八城門戶官吏兵民商賈赴回疆者必取道於此故志西域者附列之由吐魯番而西歷喀喇沙爾庫車阿克蘇葉爾羌英吉沙爾以抵喀什噶爾計四十九臺爲程四千一百餘里較之烏魯木齊至伊犁一千三百餘里程途遠逾三倍茲擬以劉錦棠全軍自北而南張曜徐占彪自東而西以規南路馬步各共四十餘營兵力不爲不厚然大軍前進不特後路根本之地兵力宜增卽餉糧軍火均宜層疊設局以便取用是監護不可無軍也前敵攻克城堡必須留營駐守以資撫輯是前後不可無軍也師行日遠留防之兵日增進戰之兵日減勢有固然況轉戰數千里士卒之傷亡疾病又在所不免乎額數有缺則士氣易墮歷觀軍興以來始稱精軍者永路或難復振半山乎此又查南路地勢東南長而西北狹山吐魯番達板城西至阿克蘇尙可一路隨行無取分道並進一至阿克蘇則局勢寬闊中路一千四百里抵葉爾羌又三百六十里抵英吉沙爾又二百里抵喀什噶爾而阿克蘇之北切近伊犁葉爾羌之東南又遙與和闐相接均須分派大支扼其總要然後直搗中堅可以迅圖殲役矣溯道光年間張格爾之變僅踞南路西四城故長齡楊遇春兵由烏魯木齊托克遜以進其時長清先扼阿克蘇懸河擊退逆衆扼

守阿克蘇然後東四城無敢竄動而長齡楊遇春乃得據無賊之地以擊賊側劉運速卒成底定之功此
次兵由烏魯木齊進局勢依然而吐魯番遠板城托克遜皆爲賊踞前途二千餘里皆爲賊守其致力雖
易固已判然而餉之絀兵之少又不如當時遠甚與其徘徊中道始請濟師正恐曠日留時事有不可測
者臣因此躊躇再四竄不得不預擬增兵伏查現駐包頭之統領卓勝全軍頭品頂戴記名提督銓僧額
巴圖魯金運昌前在甘肅督辦一帶會剿所部淮北勇丁好勇尙氣甚耐勞苦金運昌整理數年愈就馴
順近自黃甫川移紮包頭軍民相安頗得時譽臣自移駐肅州金運昌屢以在防無事堅請隨征臣時正
以採運維艱雖議增置之而金運昌西征之志益決所部各營官共相懇懇衆志相同聞其軍馬步五
千有奇尙稱精實餉事每月三萬數千兩皖督各任其半已有成說矣竊維北路解嚴山西包頭防軍本
可議撤而金運昌全軍西上尤與邊防不如近剿之說相符金運昌前在金積堡與金順劉錦棠共事一
方彼此尙稱手洽今調其西征既期與劉錦棠同心又適符金運昌本願合之兩美於時局實屬相宜臣
已函商山西撫臣鮑源深請其酌度資遣合無仰懇 天恩飭下該撫臣迅即轉飭金運昌乘秋冬初
迅速開拔西來歸劉錦棠調遣庶劉錦棠中路之軍得此後勁可以奮意驅驅而將來克復各城有移駐
之軍更番迭進前敵兵力常足免滯戎機遇有必須分支防剿之時亦可不虞竭蹶矣至金運昌西來距

鮑愈速每月半餉似難再由皖省解濟應由鮑源深與臣分任其半俾該軍餉事得歸有著其軍糧另由臣津貼以昭公允應否如斯伏祈 皇太后 皇上聖鑒訓示施行又邊疆與俄境毗連疆場之事一彼一此現當邊務交涉議論方滋不獨措置乖方遇事動多妨礙卽語言交際偶爾失當亦足啟猜嫌爭執之萌臣奉 恩命督辦新疆軍務身在事中邊防利害之分百年安危之計既不敢不引爲己任當先權其輕重緩急審機宜以泛應合局勢以通籌庶期久遠相安詐戾可泯察看俄國情形雖極出一尊而事多分屬其來中國者皆雖馴謹有加似無孽孽生端之意然不慎之於始固有難策其終者現在邊方將軍都統各大臣除金順外臣都未曾謀面一切因應之宜有臧貽所不能詳者亦有未可形諸臆牘者相距過遠並有各處業已見之行事而臣猶無所聞者事關中外交涉誠應議論分歧無以示遠人而昭莊一合無仰懇 天恩飭下將軍都統各大臣於俄人交涉事件除現行事宜本有定章應各照常辦理此外遇俄事交涉新疆者應各臣定見主辦不必先與商議致遠人無所適從庶期徑路絕而軌轍可尋論說少而爭辨自息似亦省心省事之一道也 上諭軍機大臣等左宗棠奏布置南路情形請調金運昌一軍出關及籌畫俄人交涉事務各摺片覽奏均悉據稱瑪納斯逆酋余小虎黑寶財先後率黨南竄餘匪仍堅守南城劉錦棠現已派隊前往剿辦著金順督飭各軍迅速攻拔將此股賊匪就地殲除毋任

他竄南路賊酋怕夏等分據邊板城及吐魯番城而以托克遜爲巢穴且欲俟官軍前進乘間繞竄後路
逆謀頗狡左宗棠擬令張曜一軍向關展進發徐占彪一軍由木壘河入山節節搜剿劉錦棠一軍由烏
魯木齊南下分道並進規取各城布置尙爲周密現在瑪納斯城諒不日可克卽著左宗棠飭令劉錦棠
等約定師期并力進取南路迅掃逆氛古城以西時有零星剽掠并著檄令錫綸嚴密防剿毋稍疎懈左
宗棠以各軍前進兵力尙恐不敷擬調金運昌一軍出關歸劉錦棠調遣仍由山西協濟半餉卽著照所
請行本日已諭知善慶等遵照辦理矣新疆與俄境毗連時有交涉事件輕重緩急自宜審慎以圖嗣後
遇有與俄人交涉之事著榮奎先行知照左宗棠酌度情形由該大臣主持辦理將此由六百里各諭令
知之○左宗棠奏停撤歸化包頭甯夏探運及威儀軍裁併情形報聞○是月英吉利國使臣威妥瑪回
國參贊傅磊斯署理仍兼攝荷蘭使事

冬十月戊子朔時享 太廟遣本格格恭代行禮○庚寅豐紳托克滿奏遵 旨謹照部議減罷龍江演練
正兵西丹鄂倫春牲丁歲需火藥等項工料價值勘用地租以錢合銀送款撥節核實估計下工部議奏
○諭前據都察院奏順天民人丁派富呈控丁得功勾串給事中隆光家人陳福爲常陸呈控丁萬福欠
租一案雖訊無賄囑請託等弊惟不知引嫌迴避輒照常收審並批令指傳丁萬福以致陳福倚勢招搖

緒端詐騙實屬有心徇庇降光著交部照例議處○辛卯文煜丁日昌奏等承准軍機大臣字寄光緒二年七月十八日奉 上諭御史林拱樞奏本年夏間福建省城既遭水患又被火災兼以六月間颶風大作田禾受傷災祲迭見捐賑俱窮請飭該督撫挪款濟用並飭浙江等省迅解協餉等語覽奏殊深座念前因閩省被水已諭令文煜等妥為撫恤該御史所稱被風及遭回祿情形未據文煜等奏報小民蕩析離居實堪矜憫著該督督等迅速詳查具奏一面籌款招商購米賑恤嚴飭該地方官認真辦理原摺著抄給閱看等因欽此仰見 聖主念民依無微不至跪讀之下感激涕零伏查五月間福建省城及上游各屬猝遭水患所有籌辦賑恤各緣山經臣等兩次據實奏報一面委員分頭查勘撥運糧米平糶賑恤旋據福甯邵武各屬稟報地勢較高水退較速田禾均未傷損惟米價驟昂貧民覓食維艱即經分飭各該縣勒令就地紳富碾穀平糶嗣值早稻登場米價漸平民心均已安貼至於延平府屬以將樂被水為最重沙縣次之南平上洋等屬縣又次之當水勢初退米價驟增即經分飭該屬縣或開倉平糶或截留解省兵米並由省城勒令富紳前後購米數萬石運至各該縣平糶又因將樂一縣被水尤重誠恐極貧次貧之戶無力買米復經臣等先派同知德昌通判許金綬知縣費選臣等解米二千石續派道員陳維漢總兵林宜華等齎帶銀米馳往該處查看情形分別輕重賑恤現尚未據稟復其汀州府屬惟甯

化被水稍重旱禾受傷均由該縣勸令業主借給籽種補插晚禾又古田縣之華封村貢山而居山土驟然崩陷共壓斃居民陳大等四十三名屍首均陷入山內無從取出當飭該署縣丁策勸會同委員陳寶清攜帶銀兩前往卹其家屬其餘各縣早稻均皆豐收糧價均已平減民情均皆一律安謐其省城被水之後當於城內設立粥廠七處又城上及城外分設小廠合計共十六處大廠每日就食者千餘人小廠數百人自五月二十一起至六月初三日止食粥之後復按戶給米大口一斗五升小口七升五合計閩縣領米貧民大小四千零四十三丁口侯官縣領米貧民大小九千四百一十九丁口房之倒塌無力自修者每間或給修費五錢及二錢五分并酌給男女棉衣不等其搬往城上無家可歸之貧民則每人給番銀四圓令其租房居住以免風雨漂搖至淹斃壓斃男女無主者由官收埋有主者計共六十四口除官等當場親至各家賞恤者不計外仍每口恤番銀十圓俾該家屬賴以存活復念窮民尙可以濟力自存寒士則被水之後一無可恃當飭監院教官林星炳林祥曾等密訪確查計生員葉滋年等一百零九名每名各給米一石布二疋銀一圓舉人陳祖莠等二十五名每名各給米四石布四疋銀六圓臣等又恐大水之後疾疫繼作復飭司道督同地方官擇人煙輻輳之地設立醫局城內設於宮巷城外設於南台橫山鋪多延妥慎醫生凡貧民有疾准其來局診看開方施藥每日或數百劑或百餘劑不等週日

疫氣漸消就醫者日減一日其閩縣東門外瑞應長安等鄉侯官西南關外十都十一都三十六都等鄉分爲八段亦經分飭紳士舉人魏其昌施鑑榮等會同委員攜帶銀兩查明極貧戶口按丁給賑此省城內外以及各屬被水後辦理撫恤之實在情形也閩省居民牆屋多係編竹塗泥烟燄所及頃刻卽成灰燼是以省城內外每年火災必有三四次每次或千餘間或數百間不等今年閩五月二十六日南台之二保三保於卯刻不戒失火臣等親往撲救直至巳刻始息計延燒小屋三百餘間又拆去火路一百餘間七月初十夜城內仙塔街又復失火臣等親往撲救計延燒僅止六間查向來閩省民居失火均無撫恤臣等因民情拮据逾常遂飭地方官卽將被火貧苦各戶歸入被水災民一併分給米食並勸諭業主借給資本俾令及早建修現在二保三保及仙塔街民居鋪戶業已一律修造完竣煥然一新閩省倚山瀕海颶風亦時有而此次六月十一日則因水災之後繼之以風故民情尤爲困苦臣等曾於請停餉餉摺內據實聲明其時臣會商總理船政臣吳贊誠派撥大小輪船分發沿海各港將遭風船隻一律援救人貨幸無沈失內河茶船水筏則被風飄失者頗多四鄉已穫之早稻均穫無恙而未穫之稻多有被風吹折浸水發芽晚稻並有小蟲咬蝕幸而爲時尚早農民皆買秧補種節經臣等兩札招商販運幸外米源源而來計被水後上米每官石僅三千餘文現值青黃不接之際上米每官石約在四千文左右較

之往年米價尚不漲增惟念百姓被災之後元氣損傷不能不格外廣佈 皇仁以蘇民困前經等委
派員紳分往厦門臺灣等處分別採買勸捐米石約計月內可以陸續到齊城內四門設立四廠城外南
台設立南北二廠將運到米石減價平糶除紳商兵役不准糶買外其餘各戶分別大小口均准赴廠平
買計省城內外大小口十餘萬人約一月為期擬行撤廠其時晚稻業已登場民間可無飢困之慮此由
臣等於辦理水災中兼辦火患風災分別撫恤之實在情形也至於省城內外以及各縣橋梁驛館廟宇
衙署城牆被水被風之後倒塌者甚多非有大宗鉅款難以建修其各鄉晚禾豐歉尙難預定如果不能
豐收尙須仰體 慈恩仍加賑恤惟是捐輸僅請虛銜本難踴躍而各省補解欠餉除浙江撫臣楊昌濬
咨准如數應付外其餘江西廣東兩省尙無報解消息即使有可指望亦不過杯水與薪臣等前懇將泰
撥京餉及工程經費如數報解其餘協餉暫停俟閩省喘息稍定再行陸續補解仰乞 天恩俯念閩民
屢次災祲利源已竭准如所請則此間數百萬生靈出水火而登衽席皆戴我 聖主再生之德於靡既
矣下戶部議奏○文煜等奏福建倚山枕海每過山水暴發則民田無不被淹是以百姓凡遇衝要之區
水勢可灌入者輒築土隄保衛以備不虞此次閩侯兩縣所有禦患土隄多被洪水沖決基址無存現在
水冲沙壓田畝即使設法開墾而隄防既失明年春夏之間山水一發依舊茫無津涯前功盡棄臣等再

四熟商與其暫賑銀錢僅濟目前之急不如代修隄壩可資永遠之防計閩縣應修隄壩僅二處爲費無幾業飭署福州府知府張夢元會同紳士甄其昌盧鏡秋等前往勘估興工俟官縣除官堤不計外民堤之應修築者共有十六處工大費煩向章本係民捐民辦惟被水之後民力拮据亦飭張夢元會同員紳踏勘堤內田畝有力者仍照章資助無力者全行由官給款並可以工代賑等仍當嚴督在事官紳認真舉辦務使堤工堅實足以久遠禦患捍災則百姓永免其魚非僅爲補苴一時之計而已報聞○壬辰翁同龢奏同治元年十二月內准戶部咨詳覆前撫臣嚴樹森奏軍營卹賞急請變通一摺所有咸豐十一年以前欠發卹賞銀兩應准死難之家作爲捐項倘爲數無多准作貢監必須死難子孫方准呈請其捐款應照籌餉事例及現行常例正項核算不准減成通行各省查明彙案奏辦一面造冊咨部聲明何年月日何處死事何時奉 旨賜卹何時經部議准應領若干詳細聲敘以憑核議等因奏准通行遵照在案茲據湖北布政司孫衣言詳據浙江殉難知縣孫玉田之子江夏縣附生孫麟鳳稟稱伊父由試用知縣發歿浙江於咸豐十一年十一月二十八日在浙江省城遇賊殉難同治三年十一月內彙案奏請議卹四年五月初十日蒙兵部議奏准照把總外委例給卹賞銀一百兩彙奏奉 旨依議欽此奉有知行請將應領卹賞銀一百兩遵照奏案作爲捐項爲胞姪文童孫時雨報捐監生照籌餉事例及現行常例

不准減成應照例銀一百八兩以前項卹銀抵捐除減平銀六兩尚餘銀九十四兩補繳庫平銀一十四兩共合正項銀一百八兩並繳部監照費飯食銀二兩二錢二分並乞核辦等情前署藩司因此項銀數無多批候彙案核辦迄今數年並無另有稟請抵捐之案復據該捐生孫時雨以志切觀光再四稟懇尋辦俾得早應鄉試自未便再行懸待相應專案詳請附奏等情前來臣覆核無異合無仰懇 天恩俯准勅部將文章孫時雨作為監生並填發部監各照由驛遞楚給領以示獎勵除將履歷清冊分咨戶部國子監並咨行吏禮二部查照外謹附片具陳再卹銀捐係屬創辦應援武職俸廉報捐之案作為就款報捐仍於補辦奏銷案內分別劃扣造報用歸簡便其補繳庫平現銀一十四兩飭即收入正項款內存儲入於光緒三年春撥冊內造報所繳部餉照費俟有便員即行搭解下部議奏○諭巡視中城給事中文明等奏例給貧民棉衣錢文查照舊章成案請飭發交寶銀一摺現屆冬令天氣漸寒貧民無衣情殊可憫著照所請仍准於內務府生息項下發交寶銀三千六百兩如長蘆銀兩尚未解到即於廣儲司存項內先行墊發分交五城趕緊散放以示體卹○癸巳改丁憂甯夏鎮總兵譚拔萃為署任○甲午頒給黑龍省城龍王廟匾額○丁寶楨奏請陛見允之以李元華暫署山東巡撫○修密雲縣白龍潭祠宇成頒給匾額○劉坤一奏參將黃興仁例應迴避本省惟生母年近八旬乏人侍奉情願告降懇准留於廣

西借補游擊下兵部議奏○丙申丁寶楨奏查明青州等府屬益都各縣本年被旱被蟲禾麥無收貧民冬間饑寒交迫應再設法撫卹擬請多籌款項分設粥廠並仿照隸賑捐成案勸諭各屬紳富捐助銀米核計捐項懇 恩俯准給獎以期踴躍而戢災黎允之○丁酉 慈禧端佑康頤昭豫莊誠皇太后萬壽聖節 上詣 慈禧宮行禮○沈葆楨文彬吳元炳奏 等接准部咨江北各州縣漕米仍飭辦理河運等因光緒二年七月二十五日奉 旨依議欽此查江浙冬漕及江西兩湖採辦京米均係海運獨江北十餘萬石部 臣堅持定見以爲漕運不廢河道賴以長存且有接黃濟運之方但使黃汛不至斷流則漕運終無窒步所籌至深且遠苟非迫於時勢之萬不得已 臣何敢不殫思竭力共濟時艱惟本年河運困阻情形迥非昔比不敢不以千慮所及爲 皇太后 皇上縷晰陳之從前河運愆期中途改而陸運因開兌遲延致誤黃汛耳本屆漕米於正月起至二月初十日止水次一律開行是月二十八日悉數挽過三閘僅遲不爲不速乃楊莊以北淺不盈尺非特無水濟運且須蓄水養船嗣得甘霖又經上游啟壩逐層套送隨地起剝其淤處雖剝船亦僅半裝方能浮送挑河之費打壩之費僱剝之費車絞之費所虛糜者不知凡幾然於黃汛之期固未誤也乃渡黃察看運河之底高與大河水面相埒黃流無從溜入遂議築壩興挑自口門至張秋九百餘丈挑闊三丈挑深三尺縱能暢行無阻而所費益不貲矣夫運河之底

何以高至於是則歷屆借黃濟運所淤者也借終日之力以濟之價累月之力以挑之猶可言也乃秋汛一到漕船銜尾爭進未及半而運口塞則昨日所挑者又爲今日黃流所淤餘船欲不出於陸運不可得矣借黃既不足以濟運徒使山東河道年年受淤是河道未嘗賴漕運而存且將因漕運而廢水失其本然之性商家之舟楫農田之灌溉從此交病而愚臣鯽鯽慮竊以爲無形之患又有甚於此者何則就下者水之性也大河挾泥沙而行停則淤淤則決故治河者有遏堤束黃之法又有借清刷黃之法蓋益其湍悍之性使挾泥沙疾趨不稍停留庶不致潰而旁出今黃汎力苦微弱未嘗遏堤以束之借清以刷之轉導之旁行舒其湍悍之性上游愈舒則下游愈緩所挾泥沙無力東注中道遞積數年之後河身高與堤等北潰則畿輔受其虐南潰則淮徐罹其殃而東省之首當其衝者無論也臣愚以爲水宜順其性政貴因乎時合無仰懇 天恩准將江北漕糧暫辦數年海運俟山東運道一律通暢再議酌復舊章至淮徐一帶運河所關於農田貿易者甚鉅幸淮南引地全復有款可籌斷不敢以河運暫停置水利於不顧下部議奏○辛丑景瑞奏奴才於九月初九日具 奏遵照定章敬請 龍山界內察看開修內外火道並各營汛 風水地面帶印起程卽於初十日出鮎魚關山 風水東界之鮎魚關汛大窪老廠溝折赴北界之窄過子板谷嶺黑峪關曹家路曹家營轉向西界之牆子路鎮羅關等汛以次詳察所修外

火道均將荒草落葉芟除潔淨十四日行次鎮羅關之楊樹溝汛奉到原摺軍機大臣奉 旨知道了欽此當山楊樹溝北向東南巡察將軍關黃崖關青山嶺黃花山等汛外火道亦俱修竣所有各處汛房均由該汛修補整齊按段分守青椿界內原住民戶盡皆安靜並嚴飭該官弁等務各隨時會哨敬謹巡察不准稍涉大意奴才於十六日折回恭詣 降福寺 暫安殿叩謁 梓宮並於二十日敬備 孝哲毅皇后几筵前周月致祭事宜卽赴 暫安殿後山一帶察看山上下新開火道均已完竣 宮牆廂外枯草落葉一律掃除山守護各項官兵敬謹巡守奴才於二十日起程恭詣 昌瑞山後察看新修之內火道並詣 寶山廂後察看添修之裏火道悉將內有新生細碎小樹刈除並草枯葉芟刈潔淨各處添建撥房遵照欽天監擇定歲修開工卽日以次動工建修其陳設撥房有應修補之處並山現請款內撥節黏補統計外火道長三百二十里寬二十丈 降福寺後山上下火道二段各長十五六里不等寬三十丈係由巡守官兵按段修理無須專用款項其 昌瑞山後新修之內火道長八十五里寬三十丈寶山廂後添修之裏火道長二十一里半寬十丈前後山新建撥房三十五處坍塌補建撥房四十處共新建房一百四十四間 風水圍牆廂外黏修撥房十五處計房三十間所需人工物料以及應備什物等項均由前請款內核實撥節動用事竣算明用過銀兩數目盈絀造冊咨明藩司報部查核辦理所有

新建撥房應派巡值官兵卽由前請添設兵弁兵丁內酌量勻派仍令派出官兵於空曠無汛之處不時巡邏奴才與中軍游擊兩營守備隨時加查以昭慎重報聞○乙巳豐紳壽奏截剿松花江南竄匪獲勝得旨著該將軍等探蹤搜剿務絕根株毋任紛竄○嘗京師八旗綠步各營官兵一月錢糧○瑞聯奏圍場爲國家肄武綏藩之地列聖貽謀豈容輕廢自同治初年前任都統瑞麟誤信人言輕議開墾不知圍場七十二圍之外原無隙地今之所謂邊荒皆嘉慶年間未經巡幸之圍始謀不臧貽患無窮其後麒慶設法招徠百弊叢生庫兒吉泰決意規復半途輒廢固皆由於任用非人實亦由於創議者之見小利而昧大體也奴才詳察時勢親往履勘業將大概情形奏明在案當積重難返之時成無可如何之局奴才不憚窮度於再三容或挽回於萬一已成熟者根蒂已深只可因民所利已封禁者疆界宜守勿令越畔而耕催科誠爲要務拓地寬則藏奸可慮糧捕宜設有專官濟側本屬初心待用殷則中飽須防課賦吏綜其成數除將七十二圍已放未放開具清單進呈御覽外所議章程四條敬爲皇太后皇上陳之一圍場地界急需勘清以杜再有越界一圍場地而寬廣擬添設文具專司糧捕一圍場丈出餘地分別辦理以安民業一圍場地畝既設專員應令道府催徵以重考成以上各條奴才博採輿論斟酌時勢不敢稍避嫌怨亦不敢稍遷闊奴才深知籌畫之難故自到任以來於前任已放地畝外並

未勘放寸土誠恐新舊混淆清釐更多棘手現在查丈完竣惟有悉心酌議期可垂諸永久以仰國朝
軫念剛疆之意下部議奏○丙午賞賚壽慈奕貴於紫禁城內騎馬○戊申以靜海縣紳民集捐開河
築隄以工代賑予董事曹開芬等獎敘○庚戌召慶裕來京以恩福爲奉天府尹崇實署盛京將軍○
辛亥荊州將軍巴揚阿卒卹賚如例○調希元爲荊州將軍以果勒敏爲杭州將軍○沈葆楨劉秉璋奏
知縣缺分繁簡今昔不同請 旨酌改下吏部議奏○劉秉璋奏江西省本年被水免抽米穀釐金報聞
○以如山爲長蘆鹽運使○壬子衍聖公孔祥珂卒賜卹如例○毓楨傳著景瑞奏 暫安殿几筵前恭
進冠服飾等件請飭部核議籌款撥給允之○癸丑以擒獲海州結幅匪首出力員弁王得勝林達泉
王林等獎敘○沈葆楨奏購買外洋軍火價值請銷下所司知之○署盛京將軍刑部尚書崇實卒卹卹
如例○命李鴻藻景廉在總理各國事務衙門行走○加賞寶錄館人員例支柴炭外三箇月銀兩○展
緩兵丁等借支庫銀應扣限兩箇月○甲寅調桂清爲倉場侍郎德椿爲工部右侍郎轉麟書爲理藩院
左侍郎以桂全爲理藩院右侍郎○調阜保爲刑部尚書以察杭阿爲理藩院尚書轉綿宜爲禮部左侍
郎以全慶爲禮部右侍郎○以晉慶爲鑲白旗蒙古都統慶春爲綏遠城將軍調瑞聯爲察哈爾都統以
延熙爲熱河都統○郭嵩燾奏 等出使英國據總理衙門奏定章程以駐紮三年爲期海道相距約四

五萬里每月公司輪船來往皆停泊上海一口臣等陳奏事件關係緊要應由駐紮地方拜發餘皆兩達總理衙門代奏其遞送函信及由長江遞發家信應飭上海招商局經理已飭招商局員游擊銜黃惠和收管來往信件以專責成下該衙門知之○乙卯召榮全來京以金順為伊犁將軍英翰署烏魯木齊都統杜嘎爾為烏里雅蘇台參贊大臣奎起為察哈爾副都統○張岳齡病請解任允之以李明墀為福建按察使○調緩開州等被水州縣蠲賦○允上海租界免釐及發給存票以三十六個月為限○沈葆楨吳元炳奏蘇省本年自夏徂秋恆陽缺雨江北被旱尤重淮安府屬之阜甯鹽城已成災區其餘各州縣亦均歉收饑民四出就食絡繹過江者不下萬數千人兼之山東安徽鄰近災黎亦紛紛出境流及淮揚一帶哀鴻遍野目擊心傷臣等飛飭各州縣隨地截留撫卹無任流離失所一面委員籌辦高寶河工勸諭商販疏濬鹽運河道以便災民藉工謀食並令清淮揚州浦口各要路分設粥廠山江藩司就近碾助倉穀分發各屬煮賑已過江者於蘇州常州松江太倉等處委員會同紳士分投設廠籌賑惟是地方元氣未復捐賑驟難厚集必更籌有鉅款方資接濟因思蘇松等屬每年海運案內有籌備二升餘米一畝隨止起運以備彌補沙船遭風漂溺之缺近年以來仰荷 聖主鴻福海洋安靜不波通倉厯屆餘米有儲尙鉅茲據江甯布政使梅啟熙蘇州布政司恩錫蘇松糧道英樸會詳請將本屆松蘇各屬海運

案內籌備餘米留撥江南北各處賑濟之需明春運津米數設有短絀仍於前數存倉項下撥補等情詳請具奏前來臣等伏查冬漕起運每石備帶二升餘米本在交倉正耗之外歷屆存倉米石尚多今屆暫行截留自可無虞短缺而於天庾正供亦無所出入合無仰懇 天恩俯念被旱飢民乏食困苦准將本年蘇松各屬冬漕海運案內應帶餘米約計一萬三千餘石全數截留飭令各該州縣於散徵時將此項米石提前解省分撥甯蘇兩屬搭放賑濟事竣核實報銷以廣 皇仁而拯災黎得 旨戶部速議具奏

○總理各國事務衙門奏昨據郭嵩焘等始抵上海定於十月十八日開行出洋嗣後軍機處發還該署侍郎摺報未能由驛遞寄擬由兵部遞交直隸督臣李鴻章收下山該督設法轉寄並嗣後出使他國大臣之摺報亦照此辦理以免貽誤至郭嵩焘等與總理各國事務衙門來往信函暨由該衙門代奏各件應如何遞寄之處仍歸該衙門辦理得 旨如所議行○丙辰沈葆楨奏請將積勞身故都司楊恩瀚改獎為卹允之○以拏獲淡水廳轄之銅鑼莊匪犯予出力員弁陳星聚等獎敘○丁巳裕祿奏皖北被旱撥款籌卹報聞○裕祿奏停收米糧整金報聞○是月荷蘭國使臣費果葆回任

光緒十三

臣朱壽朋敬編

臣汪錫增恭校

十一月戊午朔左宗棠豫師奏接准理藩院咨稱內閣抄出臣等會奏羊官寺柳家轉僧番義捐資積蓄勸勞籲懇天恩賞給二品頂戴一案奉旨該衙門議奏片併發欽此臣院查該柳家轉僧是否黃衣僧抑或緇衣僧並喚何名原奏內均未聲明無憑核辦請旨飭下臣等詳細查明覆奏再行核議奉旨依議欽此咨行遵照前來臣等遵查柳家轉僧轉世源流向未報明各衙門有案當即行飭該管礮伯縣知縣詳細查明具報嗣據該署知縣袁昌鸞詳稱該縣屬境內羊官寺柳家轉僧係黃衣僧轉生七世今並名喚柳家丹巴呢瑪歷輩轉生出世並未報官領過印照開呈轉生處所並數詳請核辦前來臣等覆核無異下該衙門知之○已未獎剿辦宿懷鳳匪黨出力員弁戴景明等卹陣亡練董魯宏學等○載鋼奏開創火道又奏清理河道均報聞○先是崇實奏酌撤大孤山駐防旗兵改募練兵至是下該部知之○獎剿辦馬賊出力員弁德昌等○以王佐臣左寶貴張得祿剿捕奉省巨匪交部優敘○辛酉魁齡奏奴才於閏五月二十九日奉 上諭魁齡桂清奏遵查 孝陵大碑樓情形詳細丈量開單呈覽一摺

卽派駐齡桂清按照單開各工概議承修等因欽此奴才等當經悉心籌辦和衷商榷數月以來辦理均有端倪正在繕摺具奏間適奴才桂清調補倉場侍郎所有承修 孝陵大碑樓工程可否請 旨將桂清留工抑應另請簡放大臣接辦之處候 旨遵行 上諭 孝陵大碑樓工程著改派宜振敬謹接辦○壬戌召保德入覲以王正起爲山東曹州鎮總兵○諭前據都察院奏黑龍江監生王景殿呈控棍匪竊振福句串委員托山將伊胞兄景順打傷斃命作爲自縊一案當交刑部研訊定擬具奏茲據都察院奏王景殿復以謀命重案覆驗不明等詞赴該衙門呈訴此案仍著照前親提人證卷宗秉公研訊務得確情以成信讞○鮑源深奏查河東引課例定四月奏銷嗣以行銷疲滯未能依限封完節經奏請展限在案本年四月因乙亥綱未銷引票尙餘二千餘名勢難依限望運完竣經臣援案奏請緩至七月造報奉 旨著照所請該部知道欽此遵卽轉行河東道遵辦去後旋於六月間據該道以本年春夏雨澤愆期河南旱荒尤甚鹽斤未能暢銷迭經督催仍封運無幾所有乙亥綱奏銷詳請再行續展等因當以課政攸關未便稍涉延緩卽經駁飭仍再勒限嚴催以冀無誤奏限茲復據河東鹽法道升泰詳稱據署鹽課同知賈世環轉據三省坐運商販王懷盛等稟稱溯查河東鹽務雍正以前原定三省額引二千九百餘名每名徵正雜課銀五十餘兩歲共徵銀十七萬兩有奇嗣因引課迭加至道光年間商情漸見疲乏

課項未能全清因有准令乏商舉報股實代充之舉然核計額徵每年亦僅五十萬兩咸豐三年改章官民並運三省額引共五千名正雜課銀亦均迭次加增較前已加倍時值各省軍務未平川楚淮蘆引地阻隔處處買食蘆鹽銷售倍前暢旺故逐年展加票費歲徵銀至一百餘萬兩之多課項雖逾常額而商情無慮不支同治三年各省克復川楚淮蘆引地復舊路引不能越境行銷節經奏明准將活引停止新加引費一律酌減五成歷年以來均准遵辦每年計商徵銀七十餘萬兩核計該商等領辦引鹽一名除應納課項不計外鹽價腳價所需每名亦約須銀一百餘兩成本為數仍多售賣實形喫力至豫陝兩省雖皆道路通行地方安靜究係久經兵燹戶口流亡需鹽本不及從前且有蘆淮私販浸淫紛紛不能不隱受其累是以近今數年名為課項全完實則各口岸鹽斤每多囤積皆由商民賠墊其前此之尚可支持者全恃平歲豐收民力有餘則銷售可以較廣車輶駝隻專以運鹽為大宗腳價不致增昂販運亦不致多費此河東鹽務連年賠累而尚可勉支之實在情形也本年春夏以來三省均無透雨二麥歉收豫省情形荒歉尤甚小民且艱於謀食自更他顧弗遑而車輶駝又因年荒爭運糧食腳價倍長以致會興鎮口岸囤積餘鹽至數百萬斤迄未販運售賣至山陝商販資本本不甚充封課封鹽皆係銀款所收零星鹽價皆係錢文本年銀價日增以錢易銀喫虧不少加以腳價昂貴益覺周轉為艱現在已屆展限

之期統計乙亥綱未舉三省額引尙有一千餘名竭力籌維運銷之術統籌全局若不設法變通勢必商
累課虧日益稽壓且丙子綱新引至今尙未舉銷而前項存引未完現若先銷陳引則新引開綱過遲專
顧新綱則陳引掃數無日思維至再實鮮良區查長蘆兩淮雲南山東等省曾於道光年間暨同治四年
以鹽引滯銷商力拮据請將積引分限帶銷迭經奏蒙 允准在案所有河東乙亥綱未完引票惟有籲
懇援照各省歷辦成案准予分年帶銷俾得新陳兼運以期不致貽誤等情具詳請奏前來臣查河東鹽
務自咸豐三年改章官民並運迭經隨時體察情形變通辦理以現在引課數目較之咸豐年間加課加
票雖已酌減而核以道光時定額爲數實多前數年之得以暢銷因各省軍務未平潞鹽銷售甚廣本係
適逢其會未可恃爲久長商民賠累艱難實不始於今日本年春夏亢旱歲歉民貧腳價既增銀價又貴
以致滯銷益甚不克依限封完自係實在情形刻下丙子新綱尙未開辦若再擁滯必致互相貽誤該商
等所請援案將乙綱未舉引票分年帶銷係爲乙綱未清內綱又出辦理益形棘手起見亦出於萬不得已
尙非有心支飾臣爲際此商情疲累固不得不量予變通而餉項攸關尤不得不嚴催封銷且秋後正
鹽斤旺銷之時此次得多銷一名存引日後即可少一名帶銷帶欠無多究竟辦理較易除飭該道迅即
飭催各商販等趕緊竭力封銷並一面將未完引票查明確數造冊呈送咨部查核援案分年帶銷外現

當展限已屆理合先將河東引鹽積滯商力周轉爲難各情據實據陳合無籲懇 天恩俯念課重引繁
商情貽累所有乙亥綱未掣引票飭該道趕催封銷截數造報後准予援案分年帶銷以紓民力而免貽
誤下戶部議奏○李鴻章奏 臣駐津以來籌辦洋務本年春夏旱荒麥收甚歉嗣經連得透雨晚穀收成
亦僅中稔各屬間有偏災已分撥銀米酌量撫恤津郡入冬後連近窮民就食益衆飭據天津道劉秉琳
津海關道黎兆棠督同府縣分設粥廠核實散放俾資糊口民氣尙爲綏靜現在節屆大雪河凍將封 臣
擬於十月二十七日起程回省料理一切報聞○癸亥冬至節大祀 天於 圖丘命奕諒恭代行禮○
獎天津海口建築礮臺各員○文格奏查前督 臣吳棠招募團勇一千名以三百人爲一營分爲中左右
三營其餘一百人作爲親兵小隊均係照章支給口糧光緒元年夏間因天全州屬穆坪地方漢夷土匪
在彼滋事調派團勇中營三百人前往駐紮彈壓小隊一百人派駐鄆淄交界之金馬廠查拿土匪現因
駐防日久勇力多疲自應裁汰疲弱另募精壯以歸實用 臣才當與省局司道籌商將團勇中營三百名
親兵小隊一百名於七月三十日八月二十五日先後裁撤均各給清口糧遣散歸農惟穆坪漢夷雜處
伏莽未清仍不可無勇彈壓隨札委熟悉夷情之建昌左營游擊孫廷槐另募川勇三百名取名綏邊營
其口糧仍照團勇中營章程給發帶赴穆坪鎮紮原防精實巡緝又降調三台縣知縣王宮午素嫻緝捕

前令招募傑勇一百名專司成都府屬緝捕事宜曾於添募楚勇內奏明在案惟成都地方遼闊勇丁百名不敷分緝現飭王宮午添募傑勇一百名連前共成二百名以期得力且較親兵小隊口糧亦屬有減無增再查邊地各關營內峨邊廳現駐防勇八百名峨邊營現駐防勇四百名雷波廳現駐練勇五百名定邊營現駐弁勇五百六員名查各該處防務較鬆且有省派防軍隨處策應所有該廳營之勇自應酌量裁減奴才已飭峨邊廳裁去防勇三百名峨邊營裁去防勇二百名雷波廳裁去練勇二百名定邊營裁去弁勇三百名共計一千名統俟續齊後再將裁餉日期另行咨部備查至前經奏准添募楚勇二千名計日可以來川俟楚勇到川後如查現存各營再有疲乏不甚得力者仍當隨時酌量裁撤以節糜費而重餉需報聞○乙丑一等侯刑部右侍郎恩齡卒賜卹如例○以饒祺為正白旗蒙古副都統○調麟書為刑部右侍郎轉桂全為理藩院左侍郎以惠泉為理藩院右侍郎○內寅譚鍾麟奏商州官紳捐修城隍各工請分別獎叙下部知之○丁卯諭魁齡宜振奏承修孝陵大碑樓工程請撥專款及採辦架木司員等發給公費各摺片此項工程購運石料須用練軍據奏按照估價銀數撥給五成不敷應用著照所請准撥八成實銀給發卽著戶部指撥專款僅令各該省迅速徑解工部毋得稍有遲延並著戶部先行借挪銀十萬兩俾得及時興辦俟撥款解到卽行歸還其他項工程銀兩仍照章程給發均不得援

以爲例所需柴木著魁齡等核實辦理○諭文格奏續查營勇滋事情形據實檢舉自請議處一摺據解提督李有恆所帶虎威營勇丁前在東鄉有砍傷趙姓等數人及抱去龍姓幼孩之事尖案一帶房屋焚燬多間是否該營勇丁所爲傳說不一李有恆與分帶該營提督劉道宗在途中帶有婦女訊係該提督等谷口其來歷尚未查明殊難憑信等語帶兵官攜眷隨營已屬大千軍往至營勇滋擾地方該提督等倘有縱容情事尤屬罪無可追東鄉縣哀延蛟滋事一案前經降有交李瀚章訊辦李瀚章現調任湖廣總督著交四川總督丁寶楨確切查明據實具奏勿稍瞻徇李有恆劉道宗著一併交丁寶楨審明分別革職治罪以肅戎行文格前於覆奏時未將前情查出參辦亦屬咎有應得著交部議處○監紳等奏奴才等上年五月間奏請江省七城添練西丹四千名春秋傳操各六十日每名日給口糧銀一錢餘日回屯農隙演操按月分旗調考週而復始並不再給口糧現在松花江南賊勢猖獗且時值封凍偷渡尤易非厚集兵力難資防剿查新練西丹漸有起色可供驅策擬請省城原練西丹一千二百名內練出二百於呼蘭河原練西丹六百名內練出三百於巴彥蘇蘇原練西丹四百名內練出三百分留各該處派員朝夕訓習馬步鎗箭刀矛等技藝就近備調聚賊除該西丹額有馬乾毋庸另籌外擬請自本年十月初一日起來年正月月底止每名日給口糧京錢二百文三處共留西丹七百名四箇月應發京錢計一萬

六千八百吊不請正餉亦不動歷年額徵地租查有本年巴彥縣蘇呼蘭新升科租錢足供支發此項除動用外尚有盈餘目下各段丈地委員因落雪尚未查清統俟清派竣事咨部查考合併聲明下戶部知之○諭劉坤一奏知縣自縊身死等語廣東委辦淡水分屬洋藥餉餉事務試用知縣恭鈐於本年九月間自縊身死惟據稱該故員先經查出縣內弊端丁役人等出言脅制有該故員親筆遺稿爲據等情該縣丁役人等究竟如何脅制並該故員查出弊端如何情節著劉坤一張兆棟秉公嚴訊務得確情據實具奏○己巳劉坤一等奏本年夏間高州府屬茂名縣地方有匪徒黃十陵大等聚眾結拜兄弟情事經該營訪聞查拿並經道府督飭各屬文武撥派兵役不分畛域一體嚴緝先後獲犯成晚賴晚譚老晚范庭芬李沈義李三大彭峪山七名起出書本解省復經臣等飭據廣州協弁兵拿獲首犯黃十陵大一名一併發交廣州府訊據供稱黃十陵大及未獲之李亞增共糾夥四十餘人每名出錢數百文或一千餘文交黃十陵大買備香燭酒肉結拜兄弟私立三合會貧窮會父母會各名目不論年齒共推黃十陵大爲大哥屆期黃十陵大以竹插地糊紙作門名曰木楊城又用桌椅搭橋囑令各會之人由橋下走入城內大哥頭插雙花二哥頭插單花暨稱結拜之後過事互相幫助如有死傷協力照料飲食酒肉各散等情臣等查該匪徒糾人結會無非志在斂錢調閱起獲書本荒誕不經尙無背逆之語惟自軍務以後會

匪名目頗多往往釀成事端不可不嚴行懲創除飭將該匪徒等照例辦理並勒拿逆犯李亞增等務獲
降究外所有匪徒結拜兄弟現在拿獲首從各犯緣山匪附片具陳報聞○諭李鴻章奏續行查明歉收
地方懇請緩徵糧租一摺本年直隸獻縣遷安縣秋禾被災收成歉薄若將應徵糧租照常徵收民力實
有未逮加恩著照所請所有獻縣四遷安等九十村歉收四分南郡等十一村歉收三分遷安縣永新莊
等二十四村歉收三分著將歉收四分村莊應徵光緒元二年並歉收三分村莊應徵光緒元年糧租屯
米穀豆糧課並河淤海防經費儲備軍餉等項地租及出借倉穀等項一律緩至光緒三年麥後徵收仍
減免差徭以紓民力○庚午 上諭 壽皇殿行禮○劉坤一張兆棟奏審明臈廠委員章廷彥失察司
事陳世銘浮收釐金挾獲走私藥材擅自變賣給賞分別定擬下部議奏○辛未沈葆楨文彬吳元炳奏
准戶部咨光緒二年十月初四日奉 上諭抽查漕糧御史恭鎰等奏河運米石到橋遲滯前江安糧儲
道安徽徽甯池太廣道劉傳祺著交部議處等因欽此○等跪讀之下惶悚莫名竊以挽運之疾徐視河
道之通塞該御史原奏所稱四月到通乃從前例限自東黃水穿運以來河道情形迥非昔比歷屆江北
河運均未能依限抵通而今年在東阻滯較往年為尤甚查本屆漕船於二月二十八日挽上清江各閘
正在進行適山事築壩挑河於三月初四日興工上游來源頓竭停待四十餘日至四月十一日甫經啟

壩鋪水遂於五月十七日全出江境迨入東以後運河南路節節淺阻撈剝兼施行走未能迅速於閏五
月二十七日一律渡黃較同治九年八月初三日渡黃日期尙早一月有餘乃運河北路因黃水頓消立
見淺涸荆門七級一帶河底淤墊前大幫於六月初九日勉強入運先行赴通交兌後大幫阻滯不前又
值衛水大消不敢啟壩不得已而改用接運之法舟剝不及佐之以車至八月二十三始將糯米全數
盤過北船均經山東撫臣奏報在案到通之日以今歲爲較遲挽運之難亦從來所罕見糧道劉傳祺率
同總運押運各員竭盡心力晝夜督催其輾轉剝運之難爲東省官民所共見幸得保全米石上達天
庾較之歷年辦運勞苦奚啻倍蓰至其到通較遲實因河道淺涸人力難施非無故逗遛可比查同治九
年江北漕船阻滯經山東撫臣丁寶楨奏奉 諭旨確切查參嗣經署督臣魁玉前漕臣張之萬查明確
係水淺阻滯據實覆陳奉 旨免其查議欽此本年河運漕糧於九月十四日抵通較同治九年閏十月
初四日抵通尙早二十日合無仰懇 天恩俯准將前江安徽儲道安徽寧池太廣道劉傳祺免其議
處之處出自 逾格鴻慈 上諭前因御史岑鍾等奏前江安徽儲道安徽寧池太廣道劉傳祺河運
米石到橋遲滯當降旨將劉傳祺交部議處茲據沈葆楨文彬吳元炳奏稱本年劉傳祺督催河運米石
到通較遲係因河道淺涸人力難施非無故逗遛可比請寬免處分等語劉傳祺著免其議處該部知道

○壬申劉坤一張兆棟奏等訪聞歸善縣屬有匪徒欲圖糾眾起旗謀爲不軌情事親提審訊余得萌起旗手撰焚天誓表糾同巖亞海仔等分立五營各糾黨與希圖劫掠村莊踞險抗拒其誓表內有歲逢乙亥必成大事字樣核其狂悖不法之情與叛逆已行無異自應比照問擬該文武等於逆匪起事之前卽經訪聞拿獲得以消患初萌辦理尙屬迅速所有失察職名應請免開並仰懇 天恩俯准將署惠州府知府候補知府彭翰孫署歸善縣知縣同知銜試用知縣張兆庭惠州協副將德山署陸路提標中軍參將副將銜卽補參將黎鳳山陸路提標前營游擊藍翎儘先參將何光堯交部從優議叙藍翎三品頂戴儘先都司陸路提標左營守備關貴昌請俟補都司後以游擊儘先拔補都司銜惠州協右營守備謝雲龍請以都司儘先拔補署清遠營右營守備儘先守備劉居德請加都司銜留署惠州協右營城守把總陸路提標左營右哨千總五品頂戴吳熊光請以守備儘先拔補以示鼓勵下部議奏○癸酉王文韶題雲臣奏前湖南臨武縣訓導劉洪澤籍隸新化由歲貢生在籍辦團出力保舉教職選授臨武縣訓導因私行回籍干預公事歸於同治十二年終甄別革職開缺另選在案本年丙子科鄉試該革員隱匿參案以歲貢生赴縣牒稟起文中送錄科中式第十七名舉人榜發後經臣等訪聞該革員匿過牒考情事正飭司查辦間接據藩司崇福兼署臬司夏獻雲訪聞相同並據該地方官查明稟山該司等會詳檢

舉前來應請將劉洪澤中式舉人之處先行註銷一面提省審明按律擬辦外伏查該革員前此因案撤
參其時臣雲臣尙未履任嗣於年終照案會銜甄別亦未親見其人此次來省錄科臣雲臣未能當時查
出遽行冊送入闈臣文韶監臨閩務與藩司崇福臬司夏獻雲皆未能先事覺察均屬咎無可辭相應擬
實檢舉請 旨一併交部議處至該地方官失察革員置過朦者爲之起文中送例有應得處分既經自
行檢舉俟定案時查取職名咨送聽候部議 上諭王文韶顧雲臣奏革員朦混錄科中式請註銷審辦
並自請議處一摺前湖南臨武縣訓導劉洪澤因案革職後以歲貢生朦混錄科中式舉人似此置過朦
考而宜懲辦著卽註銷舉人由王文韶提省審明按律擬辦顧雲臣於錄科時未能查出王文韶監臨閩
務與布政使崇福署按察使夏獻雲均未能先事覺察著一併交部議處餘著照所議辦理該部知道○
諭昨日召見之據補湖南寶慶協副將福謙人甚平靖著仍回原處當差○以粵省委辦礮臺工料過支
銀兩革卽補副將陳錦濤職廢行追繳○丁寶楨奏 旨接據東海關監督登萊青道龔易麟詳稱光緒二
年九月二十二日據英國領事哲美森函開英國夾板船由汕頭放洋前赴烟台駛至東大洋見有琉球
遭風難民大小八名當卽設法救起帶回來烟業山該領事轉飭水手借給衣服應請撫恤並聲明該難
民僅帶有寬永銅錢十七千七百一併附送等語該道當經發給衣服飭交福山縣查訊驗明該難民八

名各均蓄髮挽髻確係琉球國人民年約五十餘歲者三名年約二十餘歲者二名年約十餘歲者三名
詰訊住址姓名作何生理如何遭風該難民等全不通華語授以紙筆亦均不識文字無從訊取供詞東
省亦無通曉琉球國言語之人無從緝譯由縣即將寬永銅錢如數發還設館安置妥爲撫恤查琉球國
民遭風到東向由地方官稟報護送赴閩再行附便回國今該難民等並無船隻若由陸路遞送道路遙
遠適有萬年青輪船年杪須回閩願修理可否卽交該管帶官附送赴閩等情請示前來臣查琉球國遭
風難民例應遣送赴閩附便回國今該難民等在洋遭風經救赴烟全不通曉中華言語文字東省亦無
通曉琉球國言語之人無從譯訊原船又已漂失既適有萬年青輪船回閩之便自應卽飭該輪船附送
赴閩再由閩省譯訊明悉附便搭送回國較爲妥速以仰副 聖主懷柔遠人之至意報聞○甲戌諭內
閣左宗棠奏查明官軍襲攻瑪納斯城輕進失利情形一摺本年正月間涼州副都統額爾慶額總兵馮
桂增與統領徐學功議攻瑪納斯城原約二十九日會師進攻並未明定時刻額爾慶額馮桂增兩營先
進失利追徐學功率所部前進官軍已敗出城外救援不及額爾慶額並未咨商金順詳籌布置實功輕
進咎有應得著交部議處馮桂增身受重傷屬賊捐 著交部議卹餘著照所議辦理○沈葆楨奏吳城
金陵兩船廠修造船隻需用樟板前因同治十一年以後採辦漸遠運費加重又添完辦金一項是以價

值漸貴擬隨時變通辦理經前署督臣劉坤一據情咨部立案嗣臣接准工部咨覆該兩廠修造船隻工料銀兩應照同治八九兩年奏銷之案作為定章不得加增今稱隨時變通礙難核准應仍遵照題定價值造報以昭核實等因當經轉飭遵照去後茲據吳城船廠委員查復廠中每年所用樟板從前鄰近山谷便於搬運近因砍伐無時日見稀少必須赴山採買其合用之料又非多年不能成材民間感於風水非出重價不能應手實因時值不同價值迥形昂貴擬請每方核定價錢七千六百文又據金陵船廠委員查復採辦江西樟板為修造礮船所必須近因各處均赴西省採辦遇有合用板料無不昂貴況金陵與吳城尤不相同不獨水腳盤金均照吳城加多且修造瓜標四營船因界連內洋江深水闊所採板料須比吳城加厚核計近年採辦之價每方合銀六兩九錢六分一釐九毫擬請嗣後不得再逾據著江甯鹽道陶寶森再行確查該兩廠採買艱難委無浮冒詳請奏咨等語前來臣查樟板一項出產漸稀採辦愈難故價值亦漸昂貴且同治十一年秋間升任江西巡撫臣劉坤一奏奉諭旨無論何省何營採辦一切物料概不准免釐等因欽遵在案是同治十一年以後採買樟板又多盤金之費亦難與同治八九等年奏銷成案劃一辦理該兩廠時事不同變通定價尚屬實在情形相應奏明請旨俯准核銷以免採辦棘手得旨如所請行○乙亥雪○予蘇州府節婦金周氏烈婦湯馬氏山陰縣貞女劉吳氏齊

河縣貞女崔張氏旌表○丁寶楨奏臣前准順天府府尹咨以據升用翰林院侍講學士編修吳寶鋐等聯名呈稱軍興以來各省兵燹士女被戕殉難不知凡幾而僻處窮鄉因舉報無人姓名莫考者正復不少擬請於各省昭忠祠之左廡添立總牌一座上題某省某府屬湮沒未報陣亡閨丁忠魂之總位右廡添立總牌一座上題某省某府屬湮沒未報殉難士民忠魂之總位並於各省貞烈祠之中龕添立總牌一座上題某省某府屬湮沒未報殉難婦女貞魂之總位經該府尹奏奉 諭旨依議欽此咨行一體照辦等因當經欽遵轉行各處遵照在案茲據武定府知府李那稟稱各省昭忠貞烈二祠分設總位本省未報殉難士民婦女固已依附得所而外省士民在本省商賈客遊者或被賊慘害或不自盡所在皆有特以棲身異鄉較之生長於斯者其姓名籍貫更難周知而採訪舉報尤多遺漏不免靈爽無憑擬請於各省昭忠祠內前項總牌位之次再添設總牌位一座上題某省某府屬凡外省客居湮沒未報殉難婦女貞魂之總位庶幾忠魂有憑幽光普闡懇請具奏前來臣查核該府所稟係為表揚忠烈起見可否籲懇 天恩俯准咨行各省一體照辦以廣 皇仁而彰忠節得 旨如所請行○內子諭巡視東城御史文保等奏拿獲賊犯請交部嚴訊一摺此次所獲賊犯二潘大個周二侯大楊二劉大均著交刑部嚴訊懲辦其在逃之孔慶兒王三楊三張七並著步軍統領衙門順天府五城御史一體嚴拿務獲歸案

訊辦拿獲此案之司坊各員著俟刑部定案時聲明請旨○諭御史張道淵奏災區免徵錢糧積弊多端請飭查辦一摺據稱各省蠲緩錢糧該地方官於被災之區往往以輕報重以少報多甚至蠲徵在先捏稱荒歉或將免徵之款減價折收或將緩徵之項朦蔽催交其餘弊端不一而足亟應認真釐剔等語蠲緩糧租原以軫恤災黎若如所奏情形殊屬不成事體著各該省督撫隨時訪查如遇災歉地方務卽查明分數輕重核實奏辦一經奉旨蠲緩卽飭刊刻謄放徧行曉諭不准任意稽延倘查有前項情弊卽行從嚴參辦毋稍姑容將此通諭知之○獎山東機器製造局員賈振等○丁丑准故河南巡撫錢鼎銘予諡建祠○己卯李鴻章奏請卹都司王殿邦允之○庚辰以崑岡慶福爲內閣學士○辛巳李瀚章奏抵川日期並謝調楚梓恩得 旨東鄉縣匪案滋事一案前已有旨令新任四川總督丁寶楨查辦李瀚章著卽赴湖廣總督之任○壬午予故陝西巡撫劉蓉於陝西省建祠○志剛那穆濟勒端多布奏奴才等查庫倫軍營存有山京請領之神威礮鐵心銅礮及子母劈山等礮原因從前賊勢猖獗應預備利器以資攻剿現烏魯木齊已經收復則賊勢既遠防務稍鬆前所領京礮未便久留邊地況庫倫既無險阻城池可守防不勝防止有精練馬隊賊來則戰耳第馬隊洋鎗雖利無以致遠而現存京礮未便跟隨馬隊進退相依查宣化鎮存有洋劈山車礮奴才擬用口外架杆車式獨轅割做車箱每車箱架洋劈山礮兩

位共配礮車十輛卽以現請添練之馬隊百名充當車礮隊兵隨馬隊鎗礮攻擊聯絡一氣進退遠近皆宜其原隨礮車年久不適於用止將原礮運至防營其礮車十輛現雖無款可籌而所需無多擬由奴才等捐辦其原領之京礮陸續運送回京請交神機營查收轉飭各該旗營收領以重神器而固根本下該衙門知之○癸未以席大成爲巴里坤鎮總兵○甲申予故江西南贛鎮總兵程學啟建祠列入安慶府祀典○諭前任順天府府尹彭祖賢奏蘇常等府留養災民請截留海運漕糧並酌提豐備倉穀撫恤各摺片本年江北旱災較重饑民四出兼以山東安徽災黎紛紛渡江前赴蘇常就食業經沈葆楨等籌款撫恤並准截留海運籌備餘米妥籌賑撫惟饑民爲數較多江南歲僅中稔戶鮮蓄藏誠恐賑費不敷亟應預爲籌畫著沈葆楨吳元炳卽於本屆起運漕糧截留一萬石俾資接濟仍俟下屆起運將此次留賑米石存於秋後帶征項下照數補還蘇郡豐備倉存穀及生息銀兩並著沈葆楨等飭令地方官會同紳董帶查情形酌提十分之三以備賑需嗣後如遇災民入境人數逾萬仍當一律協濟該督撫務宜飭令該官紳等通盤籌畫妥爲經理毋任一夫失所用副軫恤災黎至意○諭李鴻章奏張家口駐防營房塌工請飭就近勘修一摺張家口應修各營兵房暨護營石土二壩著察哈爾都統照案就近遴派營員核實勘估自行修理所需銀兩著李鴻章飭令藩司籌款撥解以資應用○諭御史李桂林奏請革除各省

關差織造衙門總辦名目一摺京外官員所用家丁人等本不准干預公事若如該御史所奏各省關差織造衙門往往任用家丁數人名爲總辦公事悉假其手招搖把持百弊叢生殊屬不成事體而宜嚴行禁止以清積弊著各省督撫確切查明如有前項情弊卽著從嚴查禁各該監督織造等不准設立總辦家人名目僱有家丁人等再敢干預把持剋扣侵冒著該督撫卽飭地方官嚴拿懲辦勿稍輕縱○左宗棠奏據分統楚軍中路記名提督西林巴圖魯李良穆呈請在於會寧縣城購地修建忠義祠祀楚軍中路歷次陣亡傷故文武員弁及會寧縣屬隨同官軍擊賊陣亡官紳鄉團人等分別正祀附祀歲時致祭以慰忠魂並捐置民田三百畝充香火祭祀之費當經札行會寧縣查明妥議詳由甘肅軍需局核明詳辦去後茲據甘肅軍需局司道等詳稱甘肅軍興以來各屬剿賊陣亡傷故文武員弁兵勇以及隨同官軍擊賊被害官紳士庶鄉團人等有於死事地方捐建祠宇者均經由局核明例案詳請奏辦奉 旨允准各在案今分統楚軍中路記名提督李良穆等在於會寧縣城內購地修建忠義祠請將迭次陣亡傷故員弁勇丁及會寧官紳鄉團人等入祠致祭核與常祭寧夏秋道安定各屬辦過成案相符所置民田三百畝作爲祭產除完納正額丁糧外收穫租糧備辦祭品可垂久遠會議詳請援照成案 奏懇 天恩將楚軍中路迭次陣亡傷故文武員弁以及會寧縣屬隨同官軍擊賊陣亡官紳鄉團人等分別正祀

附祭一併入祠茲時由地方官致祭以妥忠魂所有入祠之官弁勇丁士庶紳團應由該提督督同會同
縣造具各該故弁勇團人等銜姓花名清冊另案詳請分送部科立案以垂永久等情前來臣查軍營陣
亡官弁原准附祀忠義祠今該提督捐資購地在於會寧縣建修忠義祠以祀楚軍陣亡傷故文武員弁
及會寧屬隨同官軍擊賊陣亡官紳鄉團人等一併入祠致祭核與成案相符應懇 天恩俯准 飭部
立案以垂永久得 旨如所請行○涂宗瀛奏越南國王阮福時遣使襲文祺等齋呈光緒三年丁丑例
貢品物經前護撫臣慶愛遵 旨定於本年八月初一日開關照會該國王遵照並經臣派委文武員弁
前往鎮南關接護來省嗣據太平府李世椿具報該國使臣等依期進關並據該國王將表奏各稿暨貢
品使臣姓名咨呈前來臣當經分晰開單山驛奏報在案茲於十月十七日據委員補用道倪懋禮甯明
州知州王德昕試用巡檢朱森溪題補右江中營遊擊汪定元伴送該使臣襲文祺等三員行人黎文等
八員隨人黎載等九名行抵桂林省城臣飭令在省休息數日照例款茶按日豐給食物查該使臣等所
帶衣服無幾不敷長途更換臣已查照舊章分別捐賞蟒袍紗綾單衫棉皮衣服等件俾資服用卽於款
茶之日按名給賞以廣 皇仁現合於十一月二十六日自省由水路起程進京經臣面諭原派改派各
委員沿途妥為照料並咨會沿途各省一體派員護送前進於來年正月內到京以仰副 聖主綏懷藩

服之至意下禮部知之○乙酉楊岳斌奏查船隻爲江湖利用鎗礮爲戰守先聲竄聞臣自江蘇派流而
上次第查閱瓜州湖口漢陽岳州四鎮及提標兩營均令勇丁駕駛船隻較其盪槳遲速復驗用舵鑿滯
分別賞革尙無老弱充數及羣黨爲害等事營哨隊弁演放鎗礮法式縱橫嫻熟尤者中靶多少以定優
劣其中篤誠供職操防嚴密者均已按官階咨記升補以示鼓勵而肅戎行或操演未甚純熟而富強尙
堪造就者臣懇切誥誡勒限回營學習並飭各鎮總兵認真簡核若差操疎忽身體柔懦難期振作者卽
移會提督再加結實甄別從嚴參革各營演大隊陣式雖未盡步武整齊聲勢聯絡緣平日分守哨汛專
任在戢盜安良自難朝夕會操聯合紀律之故刀矛雜技跳舞擊刺動中機宜惟點驗礮位火器未能全
數精良實因餉項支絀一時礙難購換至密查糧餉正款尙少虧短辦公銀錢雜用亦未聞侵漁剋扣此
固將士之自愛爭相策勵奮興莫非 皇太后 皇上威福之所遠播也報聞○吳元炳奏前據蘇松太
道馮燧光詳稱據上海縣稟准浙江鄞縣移光緒二年七月二十七日象山縣外莊地方有造風外國船
一隻經島民喊同漁船駛救該船業已觸礁沉沒當將難番九名援救過船由象山縣轉送至縣該難番
等執有琉球國照帖三張腰牌三塊言語不通給予紙筆不能書寫見帖內註明船主金興發李宏奎金
興照三名腰牌內刻趙中雲金利福鄧卜易三名其餘三名並無腰牌照帖浙省既無通事譯訊又無便

船道送自應送交上海縣俟有該國商船到滬附搭回國除照例供給衣糧將該難番等九名同照帖腰牌一併護送到滬由縣稟報到道即經札委巡檢朱凱元照案伴送赴閩道歸本國並據聲明墊用衣糧食物委員薪水輪船水脚等項照例另行奏報外詳請奏咨前來當經分咨閩省督撫臣查照正在繕摺間接准福建撫臣丁日昌咨覆江蘇轉送到閩之浙省救護琉球遭風難民金興發等九名業經琉球使官認明並非該國之人查護照腰牌內所載官名地名皆與高麗國志相同其爲朝鮮國人無疑取具琉球通事陳天福實非琉球人民供結備案一面飭委石瑯通判李屏仍將該難民金興發等附搭輪船送回上海咨請妥護赴津轉送至京等因飭據臬司札委試用主簿蔡寶昌赴滬護送復因節交大雪北河冰凍輪船停駛請加給禦寒衣褲仍由陸路進京轉送回國詳請給咨前來臣等查向來朝鮮國遇風難民漂流到境例由陸路護送至金興發等由閩省回值北洋凍阻輪船停駛自應照例由陸路護送進京轉送回國庶臻妥速而示懷柔報聞○諭文煜著俟何璟到任後來京陛見福州將軍著何璟兼署○丙戌諭張兆棟奏考官回京由水路前進等語各省考官照例應由驛站行走近年廣東考官差竣回京輒稱患病改由水路起行殊屬有違定例除此次正考官王之翰副考官郁崑業經起程毋庸置議外嗣後著不准行

十二月丁亥朔諭禮部奏元旦令節禮儀請有遵行一摺朕奉 慈安端裕康慶昭利莊敬皇太后 慈
福端佑康頤昭豫莊誠皇太后懿旨光緒三年元旦著停止升慈寧宮寶座停止筵宴毋庸設立儀仗樂
設而不作皇帝於養心殿行禮王公大臣二品以上各員在慈寧門外行禮三品以下各員在午門外行
禮所有內庭宮眷及公主福晉命婦均著停止行禮皇帝停止升殿受賀其王公百官行禮之處均照該
部所議行○戊子李鴻章沈葆楨奏 臣葆楨前於同治十二年十一月奏陳船工善後事宜摺內請於閩
廠前後學堂選派學生分赴英法兩國學習製造駕駛之方及推陳出新練兵制勝之理連則三年連則
五年擬令船廠監督日意格詳議章程經總理衙門議請 敕下南北洋大臣會商熟籌等因奉 旨依
議欽此欽遵在案前因臺灣有事倭倭未及定議上年 臣等籌海防摺內於出洋學習一事斷斷為不謀
同辭及 臣日昌 臣暨誠先後接辦船政察看前後堂學生內秀傑之士於西人造駛諸法多能悉心研究
而應遣令出洋學習以期精益求精 臣等往返兩商竊謂西洋製造之精實本於測算格致之學奇才迭
出月異日新即如造船一事近時輪機鐵件一變而前模船身愈堅用煤愈省而行駛愈速若不前往西廠
觀摩考察終難採製作之源至如駕駛之法近日華員亦能自行管駕涉歷風濤惟測量天文沙線遇風
保險等事仍未得其深際其駕駛鐵甲兵船於大洋狂風巨浪中布陳應敵離合變化之奇華員皆未經

見自非目接身親斷難窺其秘鑰查製造各廠法爲最盛而水師操練英爲最精閩廠前堂學生本習法國語言文字應卽令赴法國官廠學習製造務令通船新式輪機器具無一不能自製方爲成效後堂學生本習英國語言文字應卽令赴英國水師大學堂及鐵甲兵船學習駕駛務令精通該國水師兵法能自駕鐵船於大洋操戰方爲成效如此分途學習期以數年之久必可操練成才儲備海防之用至學生中有人資傑出能習礦學化學及交涉公法等事均可隨宜肄業惟人數既多道里遼遠非遴選賢員派充監督不足以資統馭而重責成查有三品銜候選道李鳳苞學識宏通志慮遠大於西洋輿圖算術及各國興衰源流均能默討潛搜申外交涉要務尤爲練達實屬不可多得之才以之派充華監督必能勝任至訪詢各國官學安插學生延請洋師仍應有情形熟悉之員聯絡維持主客方無隔閡臣葆楨原奏所稱正一品銜閩廠監督日意格前已回國經臣等催調來華商辦一切該員久襄船政條理熟諳於船廠學生情誼亦能融洽以之派充洋監督必可勝任六月間李鳳苞日意格二員來津稟商臣鴻章適有烟臺之役卽攜該員同往飭令籌議章程案結後曾將該員等所議各節鈔送總理衙門核奪茲經臣等再四討論復與李鳳苞日意格切實核減學生員數以三十名爲度肄習年限以三年爲度責以成效嚴定賞罰出洋經費按分年匯解共需銀二十萬兩此項經費必應籌定有著之款臣鴻章前議由閩省

額撥解庫金不敷卽在閩海關四成洋稅項下就近添撥旋准福州將軍王文煜咨稱閩關四成洋稅暫無存款俟第六十五結屆滿再行核數撥解等因新授閩浙督臣何璟過保定時曾與面商一切亦深以爲然茲由臣呂昌函致臣鴻章議定由閩省撥金項下籌銀十萬兩閩海關四成洋稅項下籌銀五萬兩船政經費項下勻撥銀五萬兩是此項二十萬之數均已議有著落查照分年匯解章程第一年七萬三千兩有奇第二年六萬兩有奇第三年五萬八千兩有奇並游歷及應支教習脩金等費隨時核計撥匯閩力雖甚拮据必能酌量緩急以符定議應請於海防額餉內作正開銷查西洋各國均以中國遣人赴彼學習爲和好證據前派幼童赴美國英使卽有該國大書院極多將來亦可隨時派往之語秋間演案議結時臣鴻章面告威妥瑪以擬遣學生赴英學習該使允俟總理衙門知照到日轉致本國外部九月間威妥瑪回國過晤臣復與商明照辦惟該國兵船定例稍嚴聞日本近時已有七人在英兵船學習臣在烟臺閱視洋操卽見有日兵武弁在英國鐵甲船隨同操演今議學生分班送往又有郭嵩壽等駐英商辦當無礙難之處至法使白來尼屢以日意格辦船有效爲言此舉亦該使所深願擬令該監學等率同學生於明年正月啟行應請飭下總理衙門迅速分別咨照英法駐京公使令其轉達本國妥爲照料臣鴻章於本年三月間因洋員李勛協回國之便派令武弁卞長勝等七人同赴德國軍營學習兵技

當時未派監將心甚懸念此次李鳳也出洋飭令該員按三月一次山輪車馳赴德國兼查卡長勝等功課並請總理衙門酌量照會德國駐京公使一體知照辦理近自同治十二年籌遣幼童赴美學習之後上年日意格回國臣葆楨遣學生數名隨往游學本年臣鴻章又遣卡長勝等赴德國學習此次又派李鳳也等率領學生分赴英法兩國從此中國端緒漸引風氣漸開雖未必人人能成亦可拔十得五實於海防自強之基不無裨益謹將臣等籌議船政學生出洋章程及經費數目分繕清單恭呈 御覽仰懇 飭下總理衙門核准施行得 旨下該衙門知之○改派許鈴身往福建船政局差委何如璋充出使日本國欽差大臣張斯桂副之○辛卯 上詣 奉先殿 壽皇殿行禮○壬辰賞四川總督丁寶楨紫禁城內騎馬○以文徵爲都察院左副都御史○甲午以介休縣武舉張晉華糾夥發塚斥革緝究○以前汾陽縣知縣李煥揚太原縣知縣魏象乾解審要犯脫逃交部議處○諭都察院奏昌平州孀婦李劉氏以民人蕭山林等勾串公傷瑞興車夫倚勢掘墳棄骨案懸數載未經勘驗等詞赴該衙門呈訴請旨辦理等語此案著交刑部提集人證卷宗秉公嚴訊務得確情按例定擬具奏○乙未丁泗濱以病免授彭玉爲碭石鎮總兵○予楚雄縣孝婦丁周氏旌表○丙申文煜丁日昌奏琉球遭風難民譚訊撫卹報聞○黎培敬奏欽奉 諭旨道員劉嶽曙與該撫是何姻親未經聲叙明晰著卽據實具奏等因欽此

臣與劉嶽曙籍隸湖南雖係同鄉究罕謀面經前撫臣曾璧光奏調來黔辦理軍務臣見其認真防剿不辭勞瘁於同治十三年冬以臣第三子聘定劉嶽曙之次女為室均年未及歲尙未完婚是臣與劉嶽曙係屬兒女姻親係辦理軍務照例未及聲明仰蒙垂詢據實覆陳奉旨劉嶽曙著仍回四川候補○諭毓楠等奏直隸各州縣欠交永濟庫租銀請旨飭催等語永濟庫支發款項全賴各州縣征解租銀接濟乃近來直隸遵化薊州豐潤三河玉田等縣欠解新舊租銀為數甚鉅並不依限解交實屬延玩現在該處待放各項需款孔亟著李鴻章卽飭藩司查明各該州縣欠交數目勒限嚴催務令照數征解以供支發毓楠等片內撥寫錯誤實屬疎忽毓楠等著交該衙門議處○左宗棠奏官軍會師攻克瑪納斯南城大概情形業經臣金順具摺馳報嗣臣宗棠接准臣金順咨會七月十五日率所部馬步各隊馳抵瑪納斯南城飭統領禮字營提督劉宏發紮南城正東親兵營總兵張大發紮城東北統領英字營副將方春發紮城東南與統領振武營副將徐學功統帶馬隊廣州副都統福珠哩聯絡一氣城西則令健銳營營官和振興駐紮臣金順率親軍步隊營官參將余致和與統領定西營提督孔才分紮城北令吉江馬隊翼長巴里坤領隊大臣沙克都林扎布為游擊之師分布既定臣金順於二十日親率總兵鄧增都司張玉林以後膛開花大礮轟城東北角樓橫場丈餘劉宏發方春發趁勢移卡逼紮城根臣金順

與烏魯木齊領隊錫綸麾隊於缺口直上賊乘高死抗礮石如雨總兵李大洪熊佑林參將陸輝先督鎗石槍登均被彈子中傷登時殞命方春發張玉林憤急猛撲均帶鎗傷張大發余致和率隊繼進更番仰攻緣城頭編難於施展未能得手計是役鎗斃礮斃之賊約四百餘名官軍陣亡亦一百餘名二十六日統帶軍勝營提督馬玉崑遵金順檄調率隊抵瑪紮營城北八月初二日馬玉崑率隊潛登西北角樓斬守賊十餘人因羣賊譁聲拚死抗拒旋即收隊初三夜四鼓金順親督馬玉崑率軍攀堞而上奪西北角樓賊負隅死鬪馬玉崑麾壯士連撲數次斃賊甚多適樓中賊儲火藥為礮火引著樓桷倒塌勇丁被壓傷者十餘名馬玉崑亦被石傷副將銜游擊胡翹章冒火衝殺被鎗子中傷殞命余致和麾隊直前而帶右傷獨裹創血戰劉宏發趕於西北角缺口搶築三卡高出城頭明刻忽南風大作烟焰賊空遂即收隊計是日斃賊三百餘名官軍傷亡亦二百餘名嗣是樓賊守備愈嚴晚間以繩繫柴草溜油燃燒光如白晝各面缺口均以蘆席裹土填砌沿城屋頂但築垛口排設洋鎗為死守計孔方春發復分軍於關廂內添築堅卡十一日訓知賊將出竄飭馬步各營嚴備劉宏發與營官劉占魁李大全率隊越卡截擊殺賊數十名劉宏發左手中指被飛子擊斷馬玉崑督隊繼進搶奪城樓斃賊多名賊復踞短垣密排叉子鎗伺官軍上城連環施放相持既久官軍傷亡者七十餘名十四日飭鄧增三等侍衛雙全以後

墮開花大礮譚城西南二而十五日密飭馬玉崑仍於日夕率隊向西北角缺口搶登劉宏發率隊繼之
孔才方春發兩軍由北門礮樓分東西攻擊和振興張長安攻西門礮樓張大發張志德余致和攻東北
角樓徐學功劉春元攻東南角樓屆時臣金順懃高調度飭營務處委員知縣長庚員外郎周先禮佐領
恩澤光祿寺署正余應鈞分面督攻各軍或肉薄而登或緣梯登上斃悍賊多名西城門樓墮賊蜂出官
軍猛進賊既敗復又回撲如是者十數次定西營營官總兵張大發杜生萬緣城直上均被鎗傷斃命總
兵銜副將司世道把總邵芝游擊楊占魁市上城頭或中鎗傷或被矛刺皆逾時而殞計是役斃賊約七
百餘名官軍陣亡二百餘名十七日總統湘軍西甯道劉錦棠派湘軍營務處道員羅長祐統領湘左營
翼夏鎮總兵譚拔萃統領旌營馬隊提督黃萬鵬統領董宇營總兵董福祥各率所部馳抵瑪納斯助剿
當令紮營城南及西南隅高築礮臺並與臣金順所部分隊修掘長壕二十六日工竣適署伊犁將軍臣
榮全抵瑪會剿二十九夜飭方春發山關廂內掘成地道九月初一日午刻舉發轟塌城身二丈餘方春
發麾隊從缺口入賊憑城內短垣密施鎗礮牆上磚石紛飛未能搶進湘軍譚拔萃等同時由南面進攻
亦因城頭賊眾密布無隙可乘開放大礮數十子飛入城中旋即收隊訊據難民供稱賊中僞元帥韓刑
臆已被官軍礮斃初二日早臣金順所部與湘軍仍由缺口進攻賊預豎木柵加裹濕氈以擋鎗礮精善

旗旗官都司崔偉督隊猛攻手刃數賊臂中矢傷拔矢疾戰賊拚死抵拒遂仍收隊回營計是役官軍陣亡勇丁十九名受傷弁勇九十五名十二夜方春發復於關廂內掘成地道湘軍營務處羅長祐及譚拔萃董福祥等仍由缺口進攻臣金順與榮全親督方春發馬玉崑各軍由北城樓進攻天色向明地雷舉發轟塌城身兩丈餘各壯士奮勇搶登斃賊無算忽南風大作烟塵障天咫尺莫辨乘勢猛撲提督楊必顯持刀督戰被鎗子中傷殞命孔才率旗纛進亦被鎗傷計是役官軍傷亡百九十餘名六十七等日賊乘夜越壕經官軍鎗礮擊走旋又復來湘軍營官提督楊秀齋停止更鼓飭守壕弁丁靜伏壕邊並備繩索鐵鉤密排鎗礮待之夜深賊果復至鎗礮排擊斃賊頗多有三賊墮入壕溝官軍用繩繫鉤引之而上據供均係西河營賊黨原籍或西寧或河州因城中糧盡無路可竄逆首韓刑臘既斃海宴接充頭目遣令偵探虛實以便乘間竄走訊畢斬之十九夜三鼓海宴赴徐學功營乞撫稟臣金順示諭呈繳馬械網獸各逆首然後遣餘眾名冊聽候點驗分別辦理海宴願即遵辦二十一日平明賊眾二三千人突出西門老幼婦女居中悍黨持鎗械排隊夾護臣金順知其有詐飭所部各營列隊城北湘軍列隊城南皆嚴陣以待另撥馬隊分布隘口以防竄逸一面令徐學功向前開導諭令拋棄鎗械仍准免死僞元帥何碌忽開放洋礮喊眾撲壕徐學功立麾部卒直前擒何碌物於陣前各賊目及悍黨棄械猛撲譚拔萃董

福祥等督隊得報臣金順所部由北面截殺而來賊眾左衝右突斃者大半僞元帥黑峻見勢不支以洋鎗自斃其逸出之賊經臣金順所部與湘軍馬隊及榮全額爾慶額所派各段分途追斬無遺城中匿賊經步隊一律搜斬老幼婦女悉釋勿誅湘軍營官湯秀齋生擒僞帥馬有財與臣金順所部生擒僞帥海宴王奇玉馬受等概由臣金順會同榮全提訊極刑處死其韓刑臘黑峻等尸於克城後與肇亂之僞清眞王妥得璘尸骸一併收掘戮以示眾此二十一日官軍會師克復瑪納斯城擒斬首逆殲除悍黨之實在情形也臣宗棠續接總理行營營務處西甯道劉錦棠稟述湘軍戰狀核與臣金順咨報各情相符竊維新疆北路烏桓迪化等城克復後陝回白逆等與昌吉呼圖壁瑪納斯北城據逆先後向南竄逸惟瑪納斯南城賊黨恃其城小而堅負隅死守官軍會師圍攻計二月餘傷亡精銳甚多幸賴皇上威福將士一心俾積年悍賊悉數殲除在事諸軍功績卓著合無仰懇 天恩先加甄別以昭激勸陣亡擬保提督記名總兵西拉綱阿巴圖魯李大洪總兵精勇巴圖魯張大發等一百十五員名均係血戰捐軀深堪憫惻應請 旨飭部各照官階查明議卹餘俟查明彙奏又奏瑪納斯南城既克北路一律肅清官軍方圖下兵南路掃蕩而前北路所宜籌者防南路所宜籌者剿大致判然雖兩路同是辦賊不宜有略輕畸重之分而兵數應增應減要自有辨主剿之軍步步向前步步顧後克復一城一堡卽宜分兵駐守要隘

衝途均須設局防護以通運道而速文報程途愈進愈遠兵力愈分愈單其不得不預籌增調以爲之備固也防軍但就地勢通籌城堡要隘以夷險衝僻定兵數多少別籌游擊之師備緩急策應防守之兵步宜多而騎可少策應之兵步可少而騎宜多地有定形兵數固可得而定也總計南路征軍劉錦棠山烏韓木齊南進馬步約二十九營張曜自哈密西進馬步共十五營有奇爲一枝徐占彪自巴古之間西南進馬步五營有奇爲一枝統計不過四十餘營應將來屢分見單不得已始有請調金運昌馬步全軍之奏然以人馬實數計之所增亦不過十營而已北路金順所部二十餘營及接統景廉所統十九營號稱四十餘營按照步隊每營五百人馬隊每營二百五十騎核算人馬之數較南路征軍約略相等除伊犁尙未收回不計以驛站程途計之則北路較南路縮二千里有奇兵之可議減汰一也北路景廉所部先本三十餘營金順接統挑存十九營合之金順舊部及新增馬步二十餘營爲四十餘營不爲不多矣月餉多至二十二萬兩較之劉錦棠現統各軍餉銀多至十二萬兩有奇而勢力未能一律如非分別汰減任其虛糜弱者與壯者勇者與怯者同一缺餉何以鼓舞羣情收戰勝攻取之效餉項以積欠而愈薄兵氣以缺餉而愈疲將何以戰何以守且恐因循日久患有不可勝言者兵之急宜減汰二也金順所部四十餘營步照五百人一營馬照二百五十騎核算現存實數缺額太多難以覆按若就現存實數裁汰

疲弱歸併成營勇丁得有的餉自期翕服其娶有妻室願留口外者准其酌借牛力籽種撥荒絕無主地
畝令其承墾秋後以糧抵還仍古徙民實邊之意而無其勞費近時古城巴里坤屯墾辦法多用汰遣客
軍適值歲稔價平屯丁獲利比薪糧倍徙人情樂趨卽其明驗其空缺之營哨各官及汰遣之勇丁願留
口外者亦准一律安插非徒節餉亦可實邊此時行之事尤易舉兵之應及時減汰者三也金順所部營
數計四十餘營每年應得正餉二百六十餘萬兩合計今歲所得實餉不過五十餘萬兩欠數約二百萬
兩上下其賴以敷衍尙未決裂者該軍軍糧自本年三月以後至今由古城巴里坤哈各局及俄糧
項下撥給者五百六十餘萬斤腳價牽算共實銀約六十餘萬兩而前此供支該軍軍勝英字等營糧料
尙不與也金順赴瑪納斯後關綏來屬地西湖一帶商人販運伊犁淨糧價極平減囑其趕緊定買金
順以無款爲言臣比飭西征糧臺勉湊銀八萬兩給之計臣軍墊解該軍之數已過該軍所得協餉之數
而軍心缺望仍所不免若協款仍前延不解到臣軍餉源已涸無從分潤該軍後此情形實有不堪設想
者臣與金順同辦一事休戚共之雖該軍自有專餉亦難忍置應懇 天恩迅速飭部從長計議金順一
軍月餉既無可減撥應否由欠解各省酌提巨款限期解到以濟急需並懇 飭發部款四十萬兩交金
順祇領作爲裁遣之費仍歸該營大餉扣回實成金順將所部分別裁汰歸併作爲馬步二十營以後部

播的喇即照二十營核昇並從寬給採糧開屯駝駝馬乾銀兩庶事歸核實可固軍心而各省應協該軍之款以後減半實解事體從容當可不致仍前延誤矣又奏大軍進規南路一切布置情形已詳陳在案適因瑪納斯南城未克肅軍助剿劉錦棠分軍赴之戎機遂滯比九月二十一日肅事原派馬步各營收回已在十月正值大雪封山冰凌凝結之時師行不便且劉錦棠自前赴南路搜剿逸賊行次感受沈疴派營赴瑪納斯時即已困憊難支浸至不省人事迨由古城覓醫診治始就痊可然旋愈旋發尙未復元而所部弁丁因轉戰而前未得休息旋又收剿賊種秋糧勞乏之餘多染疫氣幸入冬時疫漸次減退稍與調養可冀如常臣兩致劉錦棠酌定師期以明歲春融爲妥屆時金運昌一軍亦可趕到後路可期周密現正加撥官民車駝隻運軍火糧料存儲哈密古城以便屏遞運免致臨時竭蹶其張曜徐占彪兩軍亦均照辦巴古中間及濟木薩至烏魯木齊運道時有游氛出沒伺間劫掠已飭各防營照護搜剿矣上諭軍機大臣等左宗棠金順奏攻克瑪納斯南城大概情形並防守布置各摺片瑪納斯賊匪負隅已久現經金順親率所部會同湘軍奮力進攻於九月二十一日將南城攻克擒斬逆首何碌馬有財等餘黨搜殺無遺金順現飭禮字等營及孔才所部駐紮瑪納斯城並派英字四營暫駐呼圖壁城該將軍擬回紮昌吉縣城著即督飭各軍認真防守毋稍懈弛附近民衆并著飭令該地方官妥爲撫綏俾

得各安生業現在北路大致既經肅清自應規復南路陝回白彥虎素稱狡猾與怕夏同踞南城合謀困
圍亦在意中近日南路賊情若何劉錦棠張曜等軍曾否尅期進發著左宗棠督飭諸軍乘此聲威迅速
規取吐魯番等城以收掃穴擒渠之效金順另片奏請飭催山西等省餉銀已諭令各該省迅解奏將此
旨六百里各諭令知之○丁酉李慶綱奏豫省捐設粥廠煮賑飭屬一體妥辦報聞○庚子諭楊昌濬奏
冬漕次第開辦升任糧道如山熟悉情形請暫緩交卸並請催新任糧道胡毓筠迅速赴浙等語如山著
准其暫留浙江辦理冬漕並著吏部催令胡毓筠迅赴新任以重職守○諭崇厚奏請將任意妄爲之郎
中等革職查辦等語兵部郎中齊德堂由奉天馳往吉林措資竟敢藉端嚇詐並有私設刑具等事似此
任意妄爲實屬不安本分齊德堂著卽革職由崇厚咨行吉林將軍一體查拿審問守備張得功扶同離
擾著一併革職歸案訊辦該部知道○准在籍廣興候補道史模重赴鹿鳴並賞給二品頂戴○辛丑諭
克蒙額陳福奏地方有司歲供兵米請飭仍復舊制一摺據稱寧夏滿營每年應支俸粟米石並馬匹料
草等項向在寧夏府屬各州縣征收糧內估撥舊例以粟米及小麥兩項分別供支同治六七年以後該
州縣輒以四色搭放官兵自行糴換米石實屬不敷食用請飭明年爲始仍以粟麥備撥至例馬拴馬向
俱撥有料草近年兵丁拴馬該州縣不能全數供支現因操防緊要擬籌款續補馬數百匹請飭各州縣

將例馬拴馬應需料草仍照舊例全數供支俾得隨時續補等語各州縣應撥實夏滿營俸米關係兵食自應量加體恤著左宗棠查照向章察看地方情形斟酌辦理其馬匹料草應否全數供支著一併妥籌奏明辦理○壬寅諭刑部奏承審要案覆驗明確一摺浙江餘杭縣民人葛品連身死一案該縣原驗以品連屍身係屬服毒殞命現經該部覆驗委係無毒因病身死所有相驗不實之餘杭縣知縣劉錫彤著卽行革職卽著刑部提集案證訊明有無故勘情弊及葛品連何病致死為畢氏等因何誣認各節按律定擬具奏○諭都察院奏熱河已革生員張振元佃民郭殿元遣抱以官吏科斂民財移禍於人等詞赴該衙門呈控此案前據瑞聯奏稱張振元郭殿元係圍場巨盜有勾串委員巧據肥地苛斂民財等情擬請發遣並據張振元等呈抱控訴有無冤抑著延煦親提人證卷宗秉公研訊務得確情以成信讞該革生等倘係砌詞妄控刁風斷不可長卽著從嚴懲辦○諭都察院奏江蘇翰林院編修徐文洞遣抱以文童王豫典在籍禦賊陣亡其妻王趙氏死節等詞赴該衙門呈訴據稱咸豐十年王豫典在江陰無錫交界之黃梅等處率勇禦賊力戰陣亡其妻王趙氏矢志守節嗣因族人王康居逼嫁該氏投河身死等語王豫典等付否奏請旌卹著沈葆楨吳元炳查明具奏○瑞聯奏奴才前次具奏酌議圍場地畝章程議將闕礙正園之處一律封禁所有該佃戶等將地畝騰清其應領地畝卽由入官地畝撥補並聲明據派

公正委員前往籌辦如有應行封禁處所隨時斟酌辦理奏奉 諭旨有案所有此次購補園場地畝事宜自應委員前往隨經奴才派委刑部司員高士龍候補知縣陸昇會同前往籌辦報聞○准奉省紳民捐建故署將軍刑部尚書崇實原任將軍都興阿大學士文祥公祠列入祀典○甲辰予故福建巡撫李殿圖閩浙總督李芝昌諡○袁保恆奏福建之臺灣地雖僻處海濱而物產豐富加以民番偏處僻壤尤難非專駐大臣鎮以重兵舉其地民風吏治營制鄉團事事實力整頓治以德意孚以威信未易為功若以福建巡撫每年駐臺半載恐閩中全省之政務道里懸隔而轉就拋荒臺灣市定之規模去住無常而終為文具甚非計之得也查直隸四川甘肅各省皆以總督辦巡撫事可否改福建巡撫為臺灣巡撫常川駐守經理全臺其福建全省事宜專歸總督辦理庶事任各有攸司責成即各有專屬似於臺灣目前情形不無裨益 上諭侍郎袁保恆奏請將福建巡撫改為臺灣巡撫其福建全省事宜歸總督辦理等語著該衙門議奏○但彥訥謨帖等奏現據二品頂戴花翎候補三院卿文銑呈稱洋鎗一項為操防必須之鎗前在粵海關監督任內由外洋購得快鎗三百六十桿洋鎗四百四十桿自來火鎗子十萬二千顆鉛丸四萬顆銅帽四百盒洋火藥四百五十瓶九龍袋三百六十箇此項軍器現在天津招商局暫存請行直隸總督以便運京交納等情前來查該員捐備軍械尚屬益公臣等與醇親王公同商酌擬請賞

收潮查同治十二年八月間臣營代奏前任粵海關監督崇禮報捐洋鎰一百五十五桿欽奉 上諭神機營奏前任監督捐備軍械懇請獎勵一摺候補三院卿崇禮於粵海關任內捐辦鎰鐵等項尙屬急公崇禮著以副都統記名簡放欽此今文銛捐備洋鎰八百桿並隨鎰鉛丸什物核與崇禮所捐有益無絀應如何獎勵之處出自 皇太后 皇上逾格天恩得 旨文銛著以副都統記名簡放○丁未諭前因王文韶奏報援粵各軍疏通驛道出力各員弁單內所開游擊楊定得請賞勇號前後姓名重複當令該撫查明具奏茲據奏稱查明實係一人誤於清單內重複開列請仍賞加勇號等語楊定得著賞給懋勇巴圖魯名號王文韶開單重複殊屬疎忽著交部議處○諭劉長佑潘鼎新奏訊明失守騰越等城文武員弁擬定罪名分別開單呈覽一摺雲南騰越練軍句匪踞城順寧雲州等城相繼失陷經官軍先後克復將失守文武員弁提省查辦其甘心從逆情罪較重之已革署騰越鎮左營守備鄭開元卸署順寧協左營守備胡占龍業經劉長佑等訊明正法其餘失守騰越等城文武員弁各罪名著刑部議奏○己酉諭軍機大臣等保英奏科屬賊匪竄擾現在探剿一摺據稱十一月初七日差員松秀等管解官駝前赴金順軍營行抵科布多屬之扎哈沁鄂隆布拉克臺忽有騎馬回匪百餘名各持洋鎗等械將官駝行裝等項全行搶劫該臺駝馬亦被搶去大半等語烏魯木齊瑪納斯各城已次第克復據左宗棠金順等奏

賊匪追斬無遺何以尚有洋鎗騎馬回匪恣行搶掠此股賊匪究由何處竄去著左宗棠金順立即探明認真剿捕毋任餘孽竄擾爲患將此由六百里各諭令知之○庚戌允希元奏請陛見以濟祿署杭州將軍○癸丑王昕奏伏讀本月十六日 上諭刑部奏承審要案覆驗明確一摺浙江餘杭縣民人葛品連身死一案該縣原驗葛品連屍身係屬服毒殞命現經該部覆驗委係無毒因病身死所有相驗不實之知縣劉錫彤著卽行革職卽著刑部提集案證訊明有無故勘情弊及爲品連何病致死爲畢氏等因何誣認各節按律定擬具奏欽此仰見我 皇上欽恤刑慎重民命之至意臣愚以爲欺罔爲人臣之極罪紀綱乃取下之大權我 皇上明罰勅法所以反覆求詳者正欲伸大法於天下垂炯戒於將來不止爲葛畢氏一案雪冤理枉已也伏查此案奉 旨飭交撫臣詳核於前 欽派學臣覆審於後宜如何悉心研鞫以副委任萬不料徇情枉法罔上行私顛倒是非至於此極現經刑部勘驗爲品連委係因病身死則其原定供招證據盡屬捏造不問可知夫藉一因病身死之人羅織無辜鍛鍊成獄迫認凌遲重典在劉錫彤固罪無可追猶不解楊昌溶胡瑞瀾身爲大臣迭奉 嚴旨何忍朋比而爲此也胡瑞瀾承審此案熬審逼供惟恐翻異已屬乖謬而其前後覆審各摺片復敢狂易負氣剛愎怙終謂現審與初供雖有歧異無關罪名出入並請飭下各省著爲律令是明知此案盡屬子虛飾詞狡辨滔惑 聖聰其心尤

不可問而楊昌溶於刑部奉 旨行提人證竟公然斥言應取正犯確供爲憑紛紛提解徒滋拖累是直謂刑部不應請提我 皇上不應允准此其心目中尙復知有 朝廷乎 臣揆胡瑞瀾楊昌溶所以敢於爲此者蓋以 兩宮皇太后垂簾聽政 皇上冲齡踐阼大政未及 親裁所以藐法欺君肆無忌憚此其罪名豈止如尋常案情尋欲故入誤入已決未決比例輕重也 臣惟近年各省京控從未見一案平反該督撫明知其冤猶以懷疑誤控奏結又見 欽差查辦事件往往化大爲小化小爲無積習賄徇牢不可破惟有四川東鄉縣一案該督督臣文格始而迴護繼而檢舉設非此案在前未必不始終欺飾可見朝廷舉動自有風聲轉移之機正在今日 臣亦知此案於奏結時刑部自有定擬 朝廷必不稍事姑容惟念案情如此之離大員如此欺罔若非將原審大吏究出捏造真情恐不足以昭明允而示懲儆且恐此端一開以後更無顧忌大臣倘有朋比之勢 朝廷不無孤立之憂 臣惟伏願我 皇上赫然震怒明降 諭旨將胡瑞瀾楊昌溶賄徇欺罔之罪予以重懲並 飭部 臣秉公嚴訊按律定擬不得稍有輕縱以伸大法於天下以垂炯戒於將來庶幾大小臣工知所恐懼而 朝廷之紀綱爲之一振矣 上諭御史三所奏大吏承審要案任意賄徇請予嚴懲一摺據稱浙江餘杭縣民人楊品連身死一案原審之巡撫楊昌溶擅審之學政胡瑞瀾賄徇枉法捏造俱詞請有嚴懲等語人命重案承審疆吏及派審大員

宜如何認真研鞫以成信讞各省似此案件甚多全在聽斷之員悉心研鞫始得實情豈可意存遷就草菅人命此案業經刑部覆驗原訊供詞半屬無憑究竟因何審辦不實之處著刑部澈底根究以期水落石出并稍含混楊昌濬胡瑞瀾等應得處分著俟刑部定案時再降諭旨○甲寅 上諭 太廟行禮○諭鮑源深奏查明各州縣災歉情形請分別蠲緩錢糧一摺本年山西陽曲等州縣被旱被雹被蝗被水收成歉薄若將應徵錢糧照常徵收民力實有未逮加恩著照所請所有陽曲縣成災七分之東閭村等十五村永和縣西北鄉桑壁鎮等村莊應完光緒二年下忙正耗錢糧米豆著蠲免十分之二成災六分之陽曲縣家峪等十二村介休縣北辛武等七十四村莊永和縣東南鄉藥家灣等村及成災五分餘五分不等之蒲縣四鄉各村莊並成災五分之陽曲縣狄村等十二村莊應徵光緒二年下忙正耗錢糧米豆著蠲免十分之一蠲餘錢糧著緩至光緒三年麥熟後起分作二年帶徵其光緒三年上忙錢糧及光緒二年米豆著遞緩至三年秋後徵收陽曲縣東菜園等五村太原縣南王名等十八村莊徐溝縣集義等十一村莊隰州鎮家峪等村應完光緒二年正耗錢糧米豆均著緩至三年麥熟後起徵該四州縣應徵三年上忙錢糧同太原縣應徵二年民屯米豆著各緩至三年秋後帶徵至太原縣緩徵帶徵同治十一十二三等年及光緒元年未完錢糧米豆並隰州歷年舊欠錢糧蒲縣光緒元年舊欠二年尾欠錢

糧著一併遞緩至光緒三年秋後按最先年分分年帶征臨汾縣站裏等十七村並苗村屯應完光緒二年正耗錢糧著緩至三年麥熟後起徵三年上忙錢糧及苗村屯二年米豆著緩至三年秋後帶徵站裏等村原緩帶徵同治十一十二等年及光緒元年民欠錢糧及苗村屯原緩帶徵同治十三年及光緒三年民欠米豆著遞緩至三年起按最先年分分年帶徵薩拉齊廳喇嘛營等十八村並路三圪堆等二十九村中李芳茂等各戶應完光緒二年本折米石著緩至光緒三年秋後帶徵喇嘛營等四十七村民欠同治十一十二等年及光緒元年舊欠米豆著一併遞緩至光緒四年秋後按最先年分分年帶徵如有溢完在官者准作次年正賦以紓民力○是月改派翰林院侍講何如璋回選知府張斯桂爲出使日本國欽差大臣○是年統計出口貨值銀八千零八十五萬五千二百兩進口貨值銀七千零二十六萬九千五百七十四兩相抵贏一千零五十八萬九百三十八兩凡徵貨稅銀一千二百十五萬二千九百二十一兩